

武陽志餘

13.07
53

220.155

31-2

部二六



志餘卷四之一

福廟上

子城廂一圖



文昌廟在府學西詳新舊志嘉慶六年列入羣祀咸豐六年
升入中祀樂奏六成文舞六佾春秋祭諏日二月初三日神
誕爲告祭

欽頒樂章祝文

迎神奏丕平之章

秉氣兮靈躔翊文運兮赫中天蠅旌兮戾至雕俎兮告虔迓
神庥兮於萬斯年

志餘

卷四

福廟

一

初獻奏俶平之章

神之來兮簠簋式陳神之格兮几筵式親極昭章兮靈貺致
蠲潔兮明禋升香兮伊始居歆兮佑我人民

亞獻奏煥平之章

再酌兮瑤觴燦爛兮庭燎之光申虔禱兮神座儼陟降兮帝
旁粢醴潔兮齊肅將緩景運兮靈長

終獻奏煜平之章

禮成三獻兮樂奏三終覃敷元化兮絜神功馨香達兮膺饗
通歆以德兮昭察寅衷

徹饌交懿平之章

備物兮維時告徹兮終禮儀神悅懌兮鑒在茲垂鴻佑兮累
洽重熙

送神奏蔚平之章

神之歸兮天路遙瞻翠葆兮企丹霄願回靈眷兮福我朝
望燎奏蔚平之章

網緼降兮元氣和神光燭兮梓潼之阿化成耆定兮橐弓戢
戈文治光兮受福則那

春秋祝文

惟神道闡苞符性敦孝友並生並育德侔天地以同流乃聖
乃神教炳日星而大顯仰監觀之有赫示明德之維馨茲當

志餘

卷四

祠廟

二

仲春用昭時享惟祈歆格克鑿精虔

神誕日告祭

惟神功參橐籥撰合乾坤溯誕降之靈辰三台紀瑞慶中和
之令節九宇承暉若日月之有光明闡大義於孝友如天地
無不覆載感至治於馨香爰舉上儀敬陳芳薦精禋罔斃神
鑒式臨

府城隍廟詳舊志同治間集資重建里人劉瑜等董之

武進縣城隍廟詳舊志同治十年集資重建里人蔣燦榮等

董之

白龍菴詳舊志成豐十年燬同治三年合肥李鶴章重建自

爲記曰昔宋萬公居政府猶舉讀書時糞粥爲言而王播
重構閣黎亦有詩句籠紗之感蓋窮愁抑塞人情所至不
能忘况當患難時乎余以咸豐戊午挈家避亂僑寓揚州
次年春復徙常郡顛沛流離幾無投足所人生之困可謂
極矣嗣聞江南假浙闈補行鄉試余偕友人僦居常城之
白龍菴重理鉛槧霜鐘警夜風鐸鳴秋冷雨蕭齋孤燈照
影俯仰身世中夕勞皇時江南軍事孔亟賊去常僅百餘
里城中管弦歌舞之盛若不知禍亂之將至者心竊憂之
以爲未可久居也適湘鄉爵相召入幕因徙家江右未幾
金陵大營果潰蘇浙百數十州縣胥陷沒向之淨居名利
志餘

卷四

祠廟

三

如白龍菴者悉化爲荆榛鳥獸之區不可復問矣歲庚申
伯兄筱泉備兵贛南值逆酋李秀成擁衆由楚竄虔招勇
設防請大吏就近檄余統之九旬藏事余自是益專力戎
行今

上嗣極之元年仲兄少泉銜命撫吳亟籌恢復募淮湘萬
人募余統領經始上海節次仰攻遽克青浦嘉定地廣而
兵單迺增衆至五六萬選將分進連下崑太江吳常昭諸
州縣遂復蘇錫宜溧略嘉湖而常郡一城尙爲賊踞癸亥
十一月督軍合圍策馬舊遊之地白骨盈野村舍邱墟遺
黎之環營求食者以億萬計率皆僵仆殆斃因捐米開廠

令有司糜粥振之間以白龍菴詢諸父老概無知者城下之日微服往探徘徊瓦礫間見舊僧來呼余共語曰子非曩者稅菴讀書之李生乎余領之略詢近狀因告以軍幕可相晤也明日僧至見余錯愕不能起余笑掖之而示以重建是菴意僧驚喜拜謝去余旋命能事者鳩工庀材克日具舉而白龍菴差復舊觀焉噫嘻此固非僧所料也非惟僧不及料卽余當日棲皇古寺把卷愁臉亦豈意今日提數萬之師得有造於是邦而竝爲是菴生色哉興廢盛衰繫夫運會時當其厄似鬼神亦無可如何而終有人焉爲造物平其憾而彌其缺則仍非人之能也實神之力也

志餘

卷四

廟廟

四

余不敢貪天功忘神貺顧念其先之盛後之衰與今之廢而復興則不禁悄然以悲憬然以懼思昔之人處泰持約居安思危每不惜綜述始終形諸諷詠蓋非感其遇亦將以達其心而謂余又能已於言也乎吁播之詩也有矜意焉余何敢蹈之余之言竊比宋公之誠云爾咸豐己未攜家避兵常郡與李子玉亭張子紹京讀書城西白龍菴臨赴浙闈借試題壁詩者番得失卜窮通破浪乘風海國東天設一科羅俊彥人推三傑識英雄文章振筆鳴丹鳳聲價登門化白龍珍重題痕蘇季子再來應有碧紗籠又同治癸亥仲冬督軍進攻常州雪夜破附郭五十餘壘因憶

己未避兵是城讀書白龍菴不勝今昔之感馬上賦此以
質諸將漫天風雪苦長征萬馬千軍破竹聲再造山河經
百戰重來城郭悟三生吹簫誰識遊吳市入蔡今爭問李
名依舊白龍菴襄客江南此會賴澄清又同治甲子四月
六日克復常州口占誌感計旬十五下堅城有志平吳事
竟成時日相符關氣數失城克城皆四月天人交應感神明
是日早雨至午忽晴反風向內若有神助月初六日未時負嶠困獸欣全縛嗷澤哀鴻應再生
重到僧菴尋爪蹟舊遊如夢倍傷情又甲子梅月返皖計
將耕隱因步客冬常營感懷原韻四方無復羽書征喜聽
江流急退聲棋局閒情懷謝傅邯鄲幻夢覺盧生重將泥

志餘

卷四

祠廟

五

雪題詩句漫說凌煙繪姓名我是浮槎焦姥客入山泉水

洗心清

李公祠在白龍菴西偏光緒六年鶴章以原任甘肅甘涼兵
備道卒於籍奉

旨優卹准于立功地方建立專祀七年郡紳惲光業史致馴

沈保靖等捐建

西右廂

都城隍行廟在忠佑廟東偏詳舊志同治光緒間眾姓捐建

黃仲康汪彥傑呂金誠董之

醫學詳舊志同治四年法廣祥重修

張王廟詳舊志同治間重建

南真武廟詳舊志同治間重建山門後殿童侃劉遵益張允
手董之

孫公祠舊在左廂關廟前後改設壽安堂咸豐間郡紳惲彙
昌於興賢巷孟家菴廢址造建專祠規模宏敞功垂成而
燬於賊同治間邑紳吳容光等起造壽安堂仍設位祀焉
邑人謝應芝記曰

大清定鼎之二年江南平師次常州江陰閻君應元以守城
故死其民六萬餘人而武進孫侯以解屠城之難故活其
民數十萬人閻之義孫之仁遙望百餘里廟食千古宜也

志餘

卷四

祠廟

六

按侯之著知武進縣也著知常州府宗灝陰鷲賊民民情
汹汹灝恐會閻君以典史謝事待遷爲故明堅守江陰貝
勒博託帥師至灝私言事詐稱常民將反勸之屠城既領
之勒兵城外期府中曳燈爲號則內外齊舉兵灝入部著
侯聞變踉蹌奔入府力爭叩頭流血願以一家保全城不
反灝怒拔刀以威脅呼左右亂鞭之侯伏地無異詞而馮
可宗郭嘉穎者皆是侯之言白貝勒事得解侯回縣民數
萬人詣縣叩頭謝見侯解帶血淋漓肢體盡傷無不號哭
感激灝卒恨之罷去方是時江南初附民心未定州縣起
兵者衆向使從灝言屠城將四方聞風恐患相與拒守降

人無以安反側迨江陰旣克順流下閩粵投誠者不復叛
無兵以襲其後侯有功焉且常州當隋元時嘗用兵自明
湯襲武更築城形勝非昔比卽有不靖之兵罔顧利害業
蒙侯以生詎忍以作亂之故爲侯罪則雖謂常民之不反
亦繫侯之功可也而常民祖父咸被侯德永永尸祝之尤
宜侯諱振先字光裕泗州人銘曰鷄之鳴犬之吠民纍纍
受福祉祖之孫父之子二百年繫生齒稻之實民無飢棉
之華民有衣澄酒醴潔牲粢咸豐十年燬同治間重建
向公祠在忠祐廟西偏祀提督向忠武公榮咸豐間憚彙昌
趙起等建陸黻恩祝文曰井絡之秀曰社稷臣經始楚粵

志餘

卷四

祠廟

七

締構艱屯回谿垂翅南溟戢鱗不有盤錯曷表貞純惟
帝念功寄茲專闔民望葉公人思寇準扼彼長驅離其心腎
卧黷當道蛟螭潛引裹創百戰誤敵多方彌縫吳越控引
湖湘三秋衽席千里耕桑新息猶存葛侯不死將門有將
亦克齊軌在漢中興趙辛繼美福我東南英靈如在展詩
成禮報德明禋春蘭秋菊白霓青雲庶幾毅魄默相宏勛
靈兮來下歆此苾芬

河南廟

唐荆川先生祠在天禧橋西子太常少卿鶴徵祔祀嘉靖三
十九年總督胡宗憲檄有司立祠帝廟西四十五年移建

今地有司春秋致祭太倉王文肅錫爵記曰武進荆川先生弱冠魁南宮以道行文章高天下嘉靖庚子建言削籍歸草衣木食若將終身焉會倭擾東南先生從田間起視師海上尋進右通政巡撫淮揚卒以勤事死提學耿公同巡撫謝公操江洪公巡按董公僉議先生於德於功當特祀遂創建祠堂祀先生於鄉頃之先生之子太常君鶴徵始謁錫爵爲記錫爵薄劣不足以知先生始按先生始末論其世焉竊惟先生躬蓋世之才負王佐之望乃其歿也弗獲勒於宗彝祭於大蒸而僅僅從鄉曲之議捧土揭木而襲先儒之俎豆先生之不幸也世之望先生者未止此

志餘

卷四

而廟

八

也世人望先生太高責成功太速多斷斷不可於晚歲之一出夫是處而非出也果哉沮溺之所事守也古未之前聞也或曰孔子則嘗以不仕說漆雕開矣夫開自以求信說耳奚不仕之足說且信亦難言之孔明自信以管樂卒爲管樂孔子自信爲周公未嘗爲周公而亦不以其故貶聖事固不可以膚論也况今天下一主東西南北惟天子命民人社稷量力而共猶之可耳有如畀之以金革嬰之以寇難而逡巡揖讓猥以求信爲解此其爲易耶難耶壬癸之交東南何等時也戰骨燐於野而檻車復相屬於道當其時舍清冷之淵而親焦頭爛額之危知者所不爲也

而先生以十五年不鑪不扇一菜一葛之夫安所取資於世而險難其身以博功名如是此其自信審矣所云自信者亦曰吾斯云耳及其成功則時與命參焉昔者以漢武之雄略匈奴猶蒙死疾鬪不衰止而從容稽顙於甘露之朝世遂以魏丙之優於衛霍也而不知其襲衛霍之餘威也時之所會非但寇有惰歸事有挺緩卽兵將亦有不鍊而自精朝論亦有不爭而自定之日當先生之爲將彼未竭我未盈僅僅適相當而止而李胡兩司馬卒收其成雖然使李公當先生時兵氣囹圄未揚廟灣孽寇安能保困獸之不鬪使先生而胡公者叛人未繫組而身已伏歐刀

志餘

卷四

補

九

於市矣故曰時也大抵先生之聰明膽勇彊力忍誦雅類士

文成文成乘義士之銳平烏合未定之賊於呼吸反掌之間故

似難而易先生以孱將弱卒破人自爲戰之賊於鼓衰甲

獎之後故似易而難而至其桑榆未收棟樑已壞出師幾

時遠有志決身殲之痛道之不行也天命之矣先生縱自

信能信于天乎夫隱非難也求志爲難枯槁之士求泉石

得泉石如求以行義達道而可以必得哉求無負而已邈

先生十五年之精研博討攻苦習勞將以何求縱其功用

不大展而被髮纓冠以急國家之難迄於今啟手啟足而

無改於山中之面目其可以抱志而瞑矣自先生志不大

就而世人爲之語曰何必窮六經優游抱槩可以爲公卿
何必苦身已膏粱華腴可以飽妻子何必履及而登鋒以
退爲進操文墨而處人役可以有功嗚呼避夷而席險辭
潔而就溷先生獨非人情乎抑先生有云吾出山來看盡
世事祇少一甯武子之愚愚者非但不擇利兼不擇名尙
不能爲蠱之不事則甯爲蹇之匪躬大過之滅頂未有沈
浮於仕隱之間以自解免者今先生往矣而漸靡至於常
之君子猶皆斤斤以讀書窮理砥節修行冠冕天下先生
之流風至今在也夫其知可及也其愚不可及也夫

奉直曹青巖先生祠在烏衣橋東祀五品銜庚申殉難曹禾

志餘

卷四

祠廟

十

光緒元年里人卽其故居建祠俾後裔守祀事

資政沈別駕祠在烏衣橋東祀贈資政大夫原任湖北宜昌

通判沈耀齋繼齋江陰人僑居於常咸豐三年殉難武昌

同治三年巡撫李鴻章奏闡奉

旨照例議卹十年子保靖稟請自行捐建專祠直隸總督李

鴻章據奏奉

旨著照所請復呈由直督批准在本籍府城建立專祠咨明

禮部立案光緒元年建

許真君祠卽江西會館舊在陽邑左廂關廟西偏兵後僅存

廢址同治六年改建東下塘紅杏橋東規字號地六畝九

分有畸祠屋三十餘間江右僑商辛慎卿仁貴熊大有南敘仁等董之

靈官廟卽五顯王廟在元豐橋西詳舊志光緒間郡紳惲光業等集捐重建

西門直街

永甯律寺俗名所橋菴詳舊志同治光緒間僧自霖祖輝募捐重建

圓通菴在西郊同治十年里人唐灝高樹杏周秉方等募捐重建

懷南鄉

志餘

卷四

祠廟

十一

雷祖廟在陳渡橋嘉慶十六年倪方國建

古圓通菴在廣化門外一里許詳舊志光緒元年里人姜洪興倡捐重建

義烈祠在圓通菴祀咸豐庚申殉難諸人里人姜洪興募建忠義祠在二十七都三圖同治四年里人蔣光照曹序朝等集捐創建

海烈婦祠詳舊志初以張聖姑配道光間復以烈婦趙汪氏附并捐祭田數十畝咸豐間敦仁堂董以田租不給正供立案令佃戶回贖均有傳記兵燹後堂董吳懋濟卽以田價起造享堂五間中設海烈婦位仍附祀張烈女聖姑趙

烈婦汪氏于左右婁東陸世儀海烈婦傳曰余讀歸震川先生集見所書張貞女死節事貞女固吾郡嘉定曹巷人也嫁汪客之子客嫗多與人私不避其媿貞女醜之竊誠其夫亦時時幾諫客客父子不省反以語嫗嫗怒與羣惡少謀欲併污之姑一嘗試知不可犯乃共謀殺之鞭箠刀斧無不畢具貞女被慘毒以死震川至安亭悉其事適時又有欲緩其獄者震川爲呼籲士大夫間主持公論不遺餘力嫗惡少始得擬罪死獄中嗚呼女子之死節猶士大夫之死王事也士大夫讀書知禮義求其能死王事者千萬之中未可得一二而里巷之婦人女子能之可謂表章

志餘

卷四

祠廟

三

揚挖非我輩事乎康熙丁未正月二十七日常州毘陵驛有海氏死節一事氏徐州人固小姓夫陳有量孱弱僅知書貧不能活時海族有爲松江營弁者往依之值他調又往江陰依姪永潮潮營兵也復不能活乃轉至毘陵謀便道歸僦屋半間爲權廡計有惡少楊二者故酒家傭卒見婦駭曰此何爲者貧而麗殆奇貨可居耶乃故與有量贖貫以酒食亦稍貸其乏計得間而婦深自引匿無由款接復與有量飲血神祠結兄弟歡始得以叔嫂禮見一日有量出二乘間挑之氏厲色疾叱二倉皇遁已而悔曰吾利其姿耳與若夫交甚無謂且屢貸未償將安底乎會水涸

糧艘滯集肆前取酤有旗丁林顯瑞者與二狎二導之窺婦林魂魄蕩然不能禁語二曰若何以教我使得一近誠死無所恨二曰奚止得近誠聽我策且使人穀終身爲若妾矣彼徐州人方謀亟歸汝能賃若備納之舟中惟汝所欲爲也林大悅二乃復招有量給之曰兄欲歸久矣此間有便舟盍用附之耶有量曰甚善顧無資奈何二曰弟爲兄謀不必出資且可得錢償諸負資斧咸取給嫂亦得安歸有量大喜請策安出曰有漕舟主人覓傭書者兄善書此一機會也有量諾之得聘金三二算償諸負聘金立盡歸語氏氏問誰何有量以林告曰是頃與二同遇我者耶

志餘

卷四 補遺

三

彼往者目矚我其意常在我也且二匪人其所與必不良不可往有量亦疑然金已散莫可爲計婦終期期不可林囑衛弁以誤運遣卒脅有量夫婦登舟居第三艙氏益韜晦不得見林復謀諸二二曰夫在故也林復以廿金付有量令往蘇市置纜且曰若有贏卽奉爲行費有量以語氏氏持不可聞外方呼登舟急一小艇泊艙前有量不得已奮袂出疾掉而去故事糧艘行必祝金龍神演劇于臺是日林欲挑氏乃泊艘于臺傍豐治酒饌命所私二舟人婦叩扉饋氏曰頌神惠氏投卻不納復垂簾艙門請觀劇氏闔扉不一觀復顧二曰彼戲且不觀奈何二誚林曰世豈

有女人就男子者吾與君致之舟餘豈能相助君健男子
乃不能制弱骨耶林大喜然之亟歸使二婦持白金五錠
列案問語氏曰此林君權以奉娘子者他日出京口過維
揚當再市珠帛爲娘子歡氏怒揮其金毆二婦出詈聲達
於外林雖知不可然終以楊二之言爲然夜二鼓穴艙板
以入掩其睡也見氏方危坐大呼殺人舟人雖聞屏息不
敢問持之急聲愈厲驚寤鄰艘或呼曰林某何爲者彼既
不願林某何爲者林沮喪退微聞哀泣聲又聞窸窣聲已
而寂然揮二婦視之投繯就瞑矣時年止二十有一也林
惶遽謀匿尸米中候隙沈于河禁舟人無上岸越三日念

志餘

卷四

刑勸

高

有量且歸林之弟行四建議懸十金募舟人能死有量者
長年藍廷欣然應募得登岸卽持金密首於監兌司李朱
公公閱牘大驚燒燭傳經歷授以牘戒必得賊經歷君者
名明素多智時告密者方匿且糧艘如櫛無從拘獲乃亟
趨官所發冊得受兌籍載某月日衛弁雷播霞名下旗丁
林顯瑞米若干石曰得之矣啟城門鑰呼弁於夢寐給之
曰適奉嚴檄某艘匿逃人盍往勘弁悚息如約偕詣艘呼
舟人點名至顯瑞曰此逃人也衆方矐貽林亦肆辯忽燭
光燈影間藍廷躍出林驚曰汝往蘇那得在此經歷以牘
示之知事敗語塞就縛次晨以白金一斤啗經歷且自己

與婦姦其死者山舟人婦醜之也冀以和姦得減死且祈
緩獄經歷怒投金于地疾往驗尸藍廷從米中昇出玉色
如生氣勃勃若怒狀衣外稍完好餘盡鶉結而凡衽被上
下裙袂和袪皆連綴密縫牢不可擘蓋有量去後自紉以
備倉卒者也萬目環視闕然稱歎至有泣下者林乃不得
以和姦爲詞如法論斬獄旣具上之司李覆讞無異林復
賄衛弁爲投牒代辯言氏死反目且漕限迫領運者難猝
代司李執不可遂通詳上官林弟四走淮安囑其兄三且
告總漕如弁指希促運提質反覆緩死而司李申詳已達
如詳論罪三憂憊嘔血暴卒林計窘悔愧自怨述氏前後

志餘

卷四

祠廟

五

堅貞狀以告同獄故外人流傳益悉更恨誤聽楊二術不
令獨生適有量吳門已歸江陰營兵永潮亦至連控二二
逸捕獲之與林同質林堅質爲二所誘加嚴刑比出就獄
永潮奮長錐刺之市人不平者以萬計咸共毆二二哀號
宛轉入獄卽死輿論快之士人競捐貲立祠擬肖像啟其
棺已七十餘日顏色不變觀者咸詫以爲神祠在常州西
門外毘陵驛畔俗所稱龍嘴者是也一時爭相歎頌題詩
者屋壁皆滿自達官貴人以及鬻人乞丐無不趨拜瞻仰
捐貲恐後亦足以見三代之人心矣嗟夫子因之有感焉
烈婦之事與嘉定張貞女其不幸同其死同其志同也然

貞女以不及豫防身體髮膚備慘毒以死當時之人猶有
疑其不能無辱者賴震川爭之而後定若烈婦之死則寸
膚不露故和姦之誣卒不能挽而寃以速伸嗚呼可謂勇
能禦暴而知能衛身者也雖古稱引斧斷臂何以加焉費
國夏張烈女傳曰大丈夫之殺身成仁舍生取義者祇以
完吾性分之所當然非有矯情干譽矜奇炫異之私介乎
其中而始爲此也後之人考其行事曠世相感形諸咏歌
嗟歎謂自有生民以來必不可無此數人以綱維天地而
此數人者每閱千百年而一見甚矣大丈夫之不常有也
而不謂大丈夫之所難能而僅有者竟得之閨閣中一弱

志餘

卷四

祠廟

夫

女子也烈女張氏生於兵籍幼離怙恃養於外家伶仃孤
苦不獲親承母儀之訓誠亦豈與聞女史之箴規而貞靜
自持無非無儀側居一室介乎市廛間而聲容未嘗一徹
于戶外其與內則諸禮隱相合也年及笄尙未字人工針
務勤績紡易粟自養兼僮外婆蓋賢而且能者也居無何
隣有狂蠹會訪親者問及之蠹出妄言毀謗張氏而張氏
未之聞也其隣媪卽女之姨聞而白其母女知而駭然自
分閨中處女奈何聲名喪裂一至於此含垢忍辱是委身
於污濁也是舉十七年之志節暴棄一朝也是大傷闔範
卽無以風勵羣倫也引及啟戶刎頸而死時丙申六月初

五日也輿櫬道旁待決當事未幾而遠近見聞莫不油然而感泣或歌詩以頌之或爲文以弔之或設奠以享之咸謂張氏之一死玉潔冰清死且不朽凡所以稱道而揄揚之者亦綦詳矣然第重其死難其死而未嘗一言及於其當死昔孟子云可以死可以無死死傷勇謂其不當死也不當死而遽死其與經溝瀆者無以甚異未可謂之重且難也余觀張氏誠爲當死而死者矣何則士人憎茲多口而修省之餘久當自熄原無損於其真此可以度外置之者也卽女子遽當謗辱而有父母兄弟共信無他則疎遠無稽之說當亦無妨於容受者也若張之自幼離親似不屬

志餘

卷四

祠廟

七

毛離襄附遺隻影而忽加以閨門不正之名夫孰起而諒其心又孰從而辨其僞名之敗卽不啻身之玷矣欲不委身於汙濁非死不可欲不暴棄其志節非死不明欲以昭閩範而勵羣倫非死不得是故決然而出於此也然則張氏之死固非貪生亦豈輕死謂之死仁可也謂之死義可也浸假推之作孝必爲純孝推之作忠必爲精忠何者當死而死其心安也其德全也天下不可無此女亦豈易常有此女哉其與古之大丈夫後先輝映綱維天地殆非一人之私言乃四海之公評矣予以孤陋寡聞愧不能踵諸達尊之後表幽光於萬一然性之所感不能自己因爲當

死而死之說以明烈女之始末焉若夫稱頌揜揚才華冠世諸君子已極一時之盛非予之敢復贅也已郡紳呂佺孫江烈婦祀碑銘烈婦汪氏浙江錢塘之世家女也父早喪依母胡居常年十七歸文童趙曾慶舉止嚴重有禮法不苟笑言事姑孝雍雍一堂逾年曾慶病痢卒婦絕粒飲三日暈絕者數次誓必死母撫之曰吾生惟汝形影相依汝死吾何以生爲不啻速我死也婦遂稍進飲食然平居寂寂無怡色見者皆嗒然神喪念母之熒熒獨處也頻歸甯強容博母歡母顧而傷之輒泫泫淚下積歲餘有戚某覷胡貲屢貸不獲遂搆言誣婦婦聞之曰自此斷無生理

志餘

卷四

祠廟

六

矣卽夕仰藥死時道光十年六月十七夜午年二十有二嗚呼夫死而殉未果母老而養未終悲憤冤抑緘恨九原良可傷矣是時胡憤甚欲抵某罪而浮言無據僅以節旌於

朝迨道光二十二年修武陽兩縣志始紀其實郡之西郊向有海烈婦祠祀者爲張烈女均載志乘邑之諸君子慨然曰達禮明孝污一語卽時致命如婦者繼張女而祠海祠洵爲無愧遂合詞請於縣令令趨其請於是遷張位於堂之左而位婦於右堂五楹年久且圯門廡亦皆頹壞初胡痛女之蒼年慘死也曾捐滙里埠田六十餘畝爲立

祠致祭之需積年益田共得九十三畝贏錢二百餘千遂
修築斯堂而新其廟貌其田呈於縣永爲祠費因泐之石
而爲之銘曰蘭春而萎實清霜兮寂寂空谷罹此殃兮孝
養未卒曷早亡兮命之蹇舛心摧傷兮貞柯勁節紹遺芳
兮魂兮歸來饗於斯堂兮

懷北鄉

古善慶律寺在新閩轉水墩光緒三年道士周首明募建
向張二公祠在施橋祀提督向忠武榮張忠武國樑光緒四
年里人趙詔募建

金龍四大王廟又名西林菴詳舊志同治四年敦仁堂撥款
志餘

重建

天后宮卽福建會館在大王廟東同治八年重建閩商郭屋
曾開泰等董之

安東鄉

東嶽行廟詳舊志同治六年里人吳慶華朱謹菴等集捐重
建

府城隍行廟在四都一圖呂墅橋東詳舊志同治五年里人
沈曉峰李茂汝徐仲良等集捐重建

文昌行宮在呂墅橋鎮同治十二年沈曉峯集捐重建
忠佑禪院舊名王墅菴在符家巷西詳舊志同治九年里人

蕭增吉高三寶謝仲昌等集捐重建

待雲禪院在徐巷西詳舊志同治十年邑紳盛康重建

後蕭菴詳舊志同治九年里人黃來復等集捐重建

青墩菴詳舊志同治七年里人劉洪大等集捐重建

烈帝廟在樹椿橋鎮同治間里人陳龍德集捐重建

祝姬廟在六都三圖同治間里人吳傳順等集捐重建

萬壽菴詳舊志同治八年里人李德盛等集捐重建

太平菴詳舊志同治八年里人洪朝法等集捐重建

忠義祠在四都一圖同治三年里人沈曉峰王正吾等集捐

創建

志餘

卷四

祠廟

三

忠義祠在五都二圖同治十年里人俞蘭芳高榮桂等集捐

創建

忠義祠在五都三圖光緒二年里人鄒鴻濟陳龍德等集捐

創建

安西鄉

能仁寺一名鐵佛寺在奔牛鎮詳舊志同治光緒間僧法慧

德益智遠隱嵐等募建

姚忠毅公祠祀宋郡守姚公嘗乾隆二十七年建附郡人謝

應芳姚公傳姚公嘗本郡人字季和號蒙泉讀易之蒙慨

時事也宋資政學士少保希得子其先籍自蜀之潼川隋

大業中始祖某作鎮於常因家焉公其後也幼倜儻任俠
好兵術嫺弓馬長而折節讀書虛己下士識者知其入沈
勇謀辨有大略非佻佻公子也登咸濟進士任福建泉州
司理德祐初丁艱歸居陽羨值元人徇常州州守遁王良
臣等以城降公故與錫山陳炤善乃從荆溪道湖過梁溪
與圖恢復適都統制劉師勇總戍兵出鎮江口至遂合謀
推公爲首起民兵二萬鼓行入城良臣遁公權領州事聞
行在五月詔授公帶行營軍器監簿知常州調揚州兵七
千隸之陳炤爲通判時進士胡應爰亦家居公與議城守
喜曰君劇孟也辟爲判官又以包圭有籌略辟知武進縣

志餘

卷四

祠廟

王

朝又命副統制王安節至相與鼓勵忠義調粟治兵周城
樹柵爲固守計伯顏合兵二十萬臨城公命王安節等出
奇邀擊屢挫其鋒敵不敢逼遣人招之不從又命降將諭
以禍福公罵曰若食國厚祿不能死反說我耶狗彘辱吾
唾飛矢中之而去伯顏怒益集師至四十萬連營百里仍
調西域所部兵來攻城圍之數重又命降人王良臣役城
外居民運土併人築壘且殺人煎油作炮晝夜攻擊不息
時文信國駐平江聞急遣將麻士龍尹玉來援屹於五牧
城中氣沮公志益堅徐道明天慶觀羽流也謁問策公曰
守不獲死耳莫謙之萬安僧宜興浮屠也聞圍困糾義兵

來援亦戰死糧且盡猶截紙爲縷置於孟傳食於城以詭敵十一月乙酉伯顏親叱帳前諸軍攻北門將士力戰甫退遽攻南門士民飢疲不能旋戰城遂陷公死之州人感公義無一人稱降者伯顏怒命屠其民信國聞而誅焉德祐二年春詔贈公龍圖閣待制學士謚忠毅官其三子異翰修職郎維翰承務郎書翰將仕郎仍賜銀絹會子暨田若干俾祭葬立廟會宋亡不果邦人祀公於州學之東偏號忠義祠其子若孫承公志靖節終其身三世孫臨至皇明洪武初始就徵爲萊州同知陞保定府知府卒於官謝應芳曰時至德祐而大元橫矣姚公嘗欲以一泥丸障其

志餘

卷四

祠廟

三

狂瀾此正文山公所謂不自量力而以身徇之之謂也使當日張全不忌功兩軍競奮猶足救常而阻其長驅之勢惜乎一夫無意事關宗社百世而下有餘憤矣然常城之戰不滅睢陽公等之功無媿巡遠予嘗常志正欲爲公表彰適閱姚氏文獻得其孫淇孫所述忠義錄乃感而爲之傳淇孫維翰子字慶源讀古樂道元逸士也

三神廟在奔牛鎮詳舊志同治間里人張鈺邵鵬昇等經捐重建

節孝祠在奔牛鎮詳舊志光緒八年監生陳鑑職員張喆等集捐重建

御史沈湛源公祠詳舊志光緒十年祠裔監生沈均重建

鳴鳳鄉

仁惠觀在陳墓詳舊志內有洗心池爲金臺八景之一池側
銀杏大數十圍蔭垂數畝同治十年里人王海法等募捐
重建

武廟在鄒墟鎮康熙間有異人至廟歎息而去未幾廟燬里
人顧伯欽重建道光六年改建樓房有重建關帝廟樓碑
記同治元年毀今僅殿三楹

大士禪院在鄒墟鎮西里許爲宣講

聖諭之所同治元年燬惟乾隆九年重修碑記及崇禎四年
志餘

卷四

祠廟

三

國朝康熙七年鄉約記猶存

報恩禪院在董墅詳舊志成豐十年燬惟僧天慧塔銘殘石
尚存天慧於雍正間蒙

世宗憲皇帝召見稱

旨賜紫衣

命爲高旻寺住持後瘞此

地藏菴在十七都五圖詳舊志同治三年里人劉富玉募建
義烈祠在鄒墟橋西高岡光緒五年建

欽風鄉

季子廟在富墅同治十二年里人蔣兆榮等重建

沙隄菴在垂虹桥詳舊志同治七年里人葉友亮等重建
段莊菴在段莊橋西同治六年里人陳乾玉等重建
祠山廟一名西游塘廟詳舊志同治八年里人陳秀和何華
喜吳嘉賓等重建

龍潭廟同治五年重建

太村廟卽茶菴在海慶菴東廂地免科同治六年重建

史家廟一名鳳仙菴廟地免科詳舊志光緒二年重建

忠義祠在後圩街同治十年里人邵佛壽章慶福等建又貝
莊亦有忠義祠在貝莊菴

金雞廟在港口橋詳舊志光緒八年道士沈增安里人吳增

志餘

卷四

祠廟

五

福王銘榮等募捐重建

棲鸞鄉

姬山寺在觀莊西光緒元年趙陳吳三姓公建

忠義祠分姬山寺故地創建

華仙師祠祀神醫華佗在楊莊同治間重建

童興菴卽牛郎廟詳舊志同治間重建

大有鄉

晨山寺一名神墩寺在余宅詳舊志施徐唐莊四姓公建咸

豐十年毀光緒間重建

昌福禪院在溲溪鎮詳舊志同治間僧德培募建

忠義祠在嘉澤鎮光緒十一年建

廣慧菴在岡角詳舊志光緒九年里人蔣宗慶薛廷珍等募建

千峯寺在閩埠詳舊志光緒九年里人薛敘大王永盛等募建

昭義祠在鄭莊里人趙興史飛翰等集捐創建

忠義祠在六保里人薛廷珍伯珍集捐創建

旌孝鄉

城隍行宮在滬里鎮詳舊志廟內有三茅行宮皆同治間重建里人姜渭斌董之

志餘

卷四

祠廟

五

祠山廟俗名大臘燭廟詳舊志同治四年里人薛玉川吳乾泰姜渭斌等集捐重建

西零廟見舊志俗名蠻塘廟同治四年里人儲繼衡薛若春等募捐重建

興隆菴見舊志俗名舊菴在滬里鎮光緒十年里人薛錦榮浩昌儲學儀等集捐重建

忠義節烈祠在滬里鎮同治間里人莊應麟吳乾泰姜渭斌等集捐創建祠屋二十一間計地五分六釐六絲八忽

靈官廟在滬里鎮詳舊志光緒六年薛錦榮儲學儀林德魁等募捐重建

永興菴一名新興菴在涅里鎮邑人唐太常鶴徵記略唐開元初李文徽公以宗室卜居其里建菴額永興中肖大士像鄉人祈禱旱溢災罄歷四百九十年至宋末圯君錫君疇官禮兵兩部侍郎謀捐俸增營之會金人入寇勤於王事乃寢迄明又二百餘年鄉人虞其漸廢李氏與沈趙莊薛周繆諸姓歲修禋薦議新其宇萬歷甲辰文徽二十六世孫西庵與僧樂禪廣募鳩工未期告竣後有餘地起層樓以是鄉文學未熾鏤文曲金身時歐陽公釐正府志凡郡內寺院升於藏史唐子曰是菴肇自唐而宋而我明經百千禩神之靈垂庇境內不苦流移天札鄉之諸君子聞

志餘

卷四

祠廟

美

風興起續修往績當更不朽不可無記 按舊志云有唐進士李文徽碑記語未明析故摘略錄之

德澤鄉

清甯觀在北直街同治光緒間道士丁金成里人劉傳法等集捐重建

金龍四大王廟卽北大王廟詳舊志同治十二年僧智慧募布業重建

洪福院詳舊志同治間僧悟明里人沈啟麟等集捐重建

孝東鄉

太平寺在安家舍河西同治間里人童克敬文蔚薛允瑞等

集捐重建

綠城觀音寺見舊志在綠城墩同治間里人王芳榮等重建

觀音教寺見舊志在青城鎮同治八年重建

觀音堂在丁車村同治間重建爲講約公所

城隍行宮在韓墅同治間里人高泰占等集建

城隍行廟在安家舍河東詳舊志同治間里人童泰等集建

興國寺詳舊志同治間寺僧募建

德勝菴在郵村詳舊志同治間里人鄒川芳等集建

龍潭廟在鄒村東北詳舊志同治間里人鄒耀成集建

依東鄉

志餘

卷四

祠廟

毛

嶽祠菴在于塘鎮詳舊志節孝祠附

萬壽菴在百丈鎮節孝祠附

忠佑行宮在前于塘詳舊志

玉皇閣在于塘有銀杏一株高七八尺大十餘圍相傳爲元

季物

城隍廟在中于塘

萬佛閣在後于塘始建不知何時明成化二十一年重建有

殘碑同治間重建

祠山廟在後于塘始建不知何時明萬曆三十一年重建有

殘碑同治間修

依西鄉

東嶽行廟在魏浦詳舊志同治九年重建

真武廟卽思敬道院詳舊志同治十年重建

三官殿詳舊志同治五年重建

劉猛將軍廟詳舊志同治五年重建

循理鄉

烈帝廟二在潘墅鎮者一在塘浦墩者一皆同治間重建

忠義祠在高老橋東同治十年里人任仲和朱萬炳等集資

創建有田三十餘畝

存餒祠在東社光緒二年里人萬道昌兆昇等集捐重建

志餘

卷四

祠廟

庚

修善寺在馬鞍橋詳新志光緒八年僧向春里人陳鳳占等

募捐重建

通江鄉

東嶽廟在孟河西舊志在孟瀆河間東一里誤光緒元年里

人巢華元朱阿四鄭廷玉集捐重建

蘭陵寺卽智寶寺在萬稅鎮同治六年里人巢維新錢華行

集捐重建

城隍廟詳舊志同治九年里人馬培之孫瑞坤巢壽海等集

捐重建

西林寺光緒三年僧月璣募建

武廟同治十一年馬培之孫瑞坤巢壽海通發等集捐重建
以上武進

志

卷四

祠廟

三

志餘卷四之一

祠廟下

左廂

關帝廟在縣學東詳新舊志向列羣祀咸豐三年升入中祀
禮節悉如帝王廟樂用六成文武舞各八佾春秋諏日致祭
五月十三神誕日告祭不作樂不徹饌供品用鹿兔果酒

欽頒樂章祝文

迎神奏格平之章

懿鑠兮焜燿神威靈兮赫八方偉烈昭兮累禩祀事明兮永
光達精誠兮黍稷馨香儼如在兮洋洋

志餘

卷四

祠廟

一

初獻奏翊平之章

英風颯兮神格思紛綺蓋兮龍旂釁桂醑兮盈卮香始升兮
明柔惟降鑒兮在茲流景祚兮翊昌時

亞獻奏恢平之章

觴再酌兮告虔舞干戚兮合宮懸歆苾芬兮潔蠲扇威顯翼
兮神功宣

終獻奏靖平之章

鬱鬯兮三申羅籩簋兮畢陳儀卒度兮肅明禋神降福兮宜
民宜人

徹饌奏奠平之章

物惟備兮咸有明德維馨兮神其受告徹兮禮終罔咎佑我邦家兮孔厚

送神奏康平之章

幢葆葳蕤兮神聿歸御鳳軫兮驂虬駢降網緼兮餘翻翻願回靈盼兮德洽明威

望燎奏康平之章

焄蒿烈兮燎有輝神光遙燭兮祥雲霏祭受福兮茂典無違庶揚駿烈兮永奠疆畿

祝文

惟神星日英靈乾坤正氣允文允武紹聖學於千秋至大至

志餘

卷四

祠廟

二

剛顯神威於六合仰聲靈之赫濯崇禮典於馨香茲際仲春用昭時享惟祈昭格克鑿精虔

神誕日祝文

惟神九萬承麻兩儀合撰崧生嶽降溯誕聖之靈辰日午天中屆恢台之令序聰明正直壹者也千秋徵辟蠻之隆盛德大業至矣哉六幕肅馨香之薦爰循懋典式展明禋芬苾時陳精誠降格

帝先代雍正三年特封公爵咸豐五年經太常寺奏准帝已升入中祀其先代應照文廟崇聖祠禮特加封會祖光昭王祖裕昌王父成忠王並 頒春秋及神誕日祭文

春秋祝文

惟王世澤覃庶令儀裕後靈鍾河嶽篤生神武之姿誠溯淵源宜切尊崇之報班爵超躬桓而上升香肅俎豆之陳茲際仲春秋爰脩祀事尙祈昭鑒式此苾芬

神誕日告祭

惟王迪德承家累仁昌後崧生嶽降識毓聖之有基本本水源宜推恩之及遠封爵特超於五等馨香永薦於千秋際仲夏之屆時命禮官而將事惟祈昭格鑒此精虔

同治七年增建後殿祀帝三代邑人陸初望記曰毘陵初未有關帝廟也廟始於明嘉靖三十五年時倭寇東南王

志餘

卷四

祠廟

三

師討之師過常州軍中若見帝靈響而渠魁悉就擒督師者神帝之功檄郡守擇地於城東高曠處規作帝廟廟址相傳爲湯信國將臺前崇後卑形家言以爲不稱

國朝初大學士呂公宮構傑閣於殿後名之曰三義閣語載舊碑予幼時猶及見之咸豐十年常郡陷於粵逆逆據廟爲火藥所旋火起焚死賊數十人而廟亦燬迨同治甲子李帥統師至郡賊嬰城死守會霪雨不止我軍不得施火礮李公默禱於帝雨頓止礮石轟轟如雷霆震四百交攻而常城以復李公感帝之靈奏於

朝

賜題廟額重建前殿太守復肖帝像於其中而殿後則仍一片荒墟也謹案雍正三年追封帝三代爲公爵直省各州縣俱製神牌供奉十年又以奏請竝建崇聖祠於後殿每歲春秋有司致祭迨咸豐五年加封王爵具見

聖朝尊崇帝德報荅靈貺推本所生之至意今者前殿如舊制而聖祖考未建後殿入帝廟者輒有盛典缺如之感焉邑人許灤洲李濱沙溶三君儼立聖祖考碑記於廟而苦無位置之所初望商於家觀察子受先生先生曰不若創建後殿供奉三代以昭典禮於是估工千緡觀察獨捐七百緡許李沙三君足成之庀材鳩工閱半載而告竣同人志餘

卷四

祠廟

四

屬余記其事余糾刻聖帝心日編甫能付梓復喜斯殿之落成也謹濡墨而爲之記

湯襄武王廟在關廟東詳舊志光緒四年裔孫葆忠重建高澗縣教諭通州顧曾煥記曰余讀青門麓稿見子湘邵先生所爲東甌王廟碑竊歎王之滄縣數百年勿替而

聖朝推恩異代之典夔絕千祀也王起布衣致侯王功高而不伐以貴顯終洪武二年詔立廟雞鳴山下位王第五比其薨也肖象其中且與中山開平配太廟侑食大烝而海上諸郡縣念王築城備倭之功詣御史成英言於朝祠王定海蓋王之祖豆東南也久矣崇禎末王孫國光請專祀

王於常而常於是。是有王廟不數年。明社已屋。我朝軫念舊勞。加以

曠典

命有司。歲時妥侑。如前儀。而常於是。至今有王廟。王濠人也。奚爲廟於常。王嘗鎮常者也。王鎮常。拓常城四十里。而甃之。且有功德於常者也。王賜第中都。旋正首邱。而仲子鼐。實居常。遂爲常人。代有賢者。今同知銜候選縣榘忠王。十八世孫也。王駐節斯土。有虔秉鉞。削平吳會。所云據屋脊。坐左顧右顧者。魂魄固當戀此。而王之滴水生焉者。以似以續。克歆歆祀。矧遭遇

志餘

卷四

祠廟

五

聖世秩宗煌煌。不以餒而忽。諸爲王恫。怨宜王之英靈。不可泯滅。弓刀一動。用能効順於我國家也。咸豐庚申。粵逆陷常。王廟午夜火發。神威有赫。梟獍驚竄。彷彿當年降國。珍禽友定時是役也。王子孫死義者。男婦凡若干人。可謂不辱其先者已。難平廟址。惟存瓦礫。葆忠鳩宗人。醵錢近百千。無裨於事。遂獨力以次籌造。共費五千緡。廟貌如故。行且邀

封號。答神貺。以永於無窮焉。然則王之廟食於茲也。在勝朝。則以勞定國。在

本朝。則能捍大患。皆合祀典者也。豈獨王之孫子。世世不祧。

而已哉揆忠與余交旬余記之以揭於鸚羊豕之石
藥王廟祀炎帝神農氏在北小水門右

國朝雍正七年建乾隆四十九年增修道光二十一年燬於
火藥業夏蘭等集資重建邑人余保純爲文記之咸豐十
年復毀於賊光緒十年邑人楊道徐楊世佺等集資重建
易像設爲木位陸鼎翰記曰天地生百物皆所以衛人之
生也人生天地之間飢有食渴有飲然猶有陰陽沴盪之
感不能無以劑之神農氏旣始教民稼穡而又嘗百草定
醫經俾民無夭札物不疵厲功德垂千萬世不旣同乎履
載哉自古禮重報本疏食菜羹之微每食必祭故後世崇

志餘

卷四 祠廟

六

祀之典皆所以報本反始以爲不如是而揆諸心有未安
也吾郡北小水門之右有俗所云藥皇廟祀古帝神農其
創始與修建具詳邑志暨鄉先達余冰懷先生所譔記咸
豐季年毀於粵賊之亂兵後草築數楹規制簡陋光緒五
年同邑二品封運副楊君道徐五品銜州同楊君世佺集
藥業同人議率資重建視所質之多寡定分年抽輸之法
越五年而有成數告於有司徹其舊而更新之工始於十
年十月迄於其明年四月爲費泉七千緡而踳凡廟之內
外莫不巍然煥然視舊制益宏敞易像設而爲位以昭崇
敬正祀之道自其肇工卽諉鼎翰記之未敢以應也十一

年冬運副卽世同人復以爲請乃不獲再辭蓋以推楊君之意與食稻而祭先嗇衣帛而祭先蠶皆不忘乎始也藥物之所以養生人與穀食等實惟天地神聖之德可不知所自哉

營田廟在迎春橋西詳舊志同治四年兩邑城鄉士民公建邑人朱錫綸張黼董其役

劉猛將軍附營田廟

文昌閣在八字尖詳舊志同治五年重建

三星閣在陽湖縣署左旁詳舊志成豐二年毀於火三年知陽湖縣馮譽駒倡修邑人沈鼎鏞有記十年復毀於賊今

志餘

卷四 祠廟

七

未復碑石尙存

晏公廟在白雲渡口詳舊志同治十一年里人重建王子翼成孟淇董之 康熙癸卯楊廷鑑重修白雲禪院記曰郡城白雲渡舊有水神晏公祠明萬曆季年香火寂寥洗馬橋吳氏諸紳延兩名僧結廬祠後修習禪定肇啟蘭若構堂三楹莊嚴日盛神祠因以崇飭焉迄啟禎間經營開拓節衣鉢資厚值以易民居規模漸擴遂成白雲禪院云兩僧一爲木菴開山時兩名濟潤一卽高峯慧又名銛慧師嗣法三峰後駐錫於馬鬣祥符又稱祥符和尚傳臨濟正派此其發祥地也

新朝宏揚釋教振起宗風白雲諸弟子同心指摺以襄有成
會時雨圓寂法嗣惟中名上樞繼之更新崇建翼以兩廡
軒廡完葺香積咸整龍城東北隅居然福地矣前殿專祀
晏公爲禪宗護法按晏公諱成仔原籍江右臨江府清江
鎮太元初以人材應選入官爲文錦局堂長生平疾惡如
探湯人有不善必曰晏公得無知乎其爲人所敬憚如此
時有機戶濮姓者坐織染累鬻二女以償官公憐其無辜
捐俸貸之不足夫人脫簪珥滿其數濮得父子保聚後公
病將歸登舟卽逝從人斂具如禮未抵家里人見其揚騶
於野衣冠如故月餘訃至其見之日卽歿日也父老知其

志餘

卷四

祠廟

八

爲神立廟祀之厥後屢顯靈於江湖河海間洪武初敕封
平浪侯所禱輒有利益無漂溺患吾郡白雲渡向苦壅溺
里人建祠以祀晏公而波濤遂爾平息夫神之拯人於溺
也是其慈也羣生之日淪於苦海非諸佛慈航疇與寶筏
而登彼岸乎然則神靈福祀實緣如來而普澤而古渡荒
祠又賴名僧以護持白雲片席與濟上一燈曹溪滴水永
流萬禩可也道光二十年重修里人洪齋孫記曰郡城白
雲溪林木深秀爲邑中名勝溪之對岸常編大舸以利涉
然當溪水暴漲輒有沈溺之患舊建晏公廟以鎮之居民
乃安按續文獻通考公諱成仔明初封平浪侯七修類稿

云元末毘陵爲張士誠將所據徐達屢戰不利明祖親率
馮勝等往援順流而下江風大作舟將覆忽見紅袍神挽
舟至沙上明祖曰救我者誰也默聞曰晏公也及定天下
江岸將毀有豬婆龍在其下迄不可築有老漁以計出之
衆問老漁姓曰姓晏倏不見明祖悟曰是嘗救我於覆舟
者也乃封爲神霄玉府晏公命有司祀之則吾郡爲之立
廟者其以此歟歷年既久日就傾圮過者喟焉歲庚子春
當事者慨然以修復爲任鳩工庀材增新革朽乃輪奐容
衛煥然改觀余惟禮經有功德於民者祀之捍大災禦大
患者祀之屢顯神異保障斯民此非可同琳宮道觀可聽
志餘

卷四 祠廟

其若存若亡者乃頽圯有年今賴當事者之力得復舊規
則凡見廟貌之肅若丹雘之聿新孰不頌神之功德及諸
君子修廢舉墜之意耶是歲仲夏苦潦兼旬溪水四溢而
卒無覆溺者其神之福歟亦諸君子虔恪之念之所致歟
是宜伐石刊詞以爲桑梓勸故余樂而記之

地三分三釐三毫零又五百七十九號五分六釐六毫零

廟基投字五百七十八號

按七修類稿晏公名戍仔

趙恭毅公祠在縣學東詳舊志同治光緒間裔孫振紀烈文
等重修

護國寺在斜橋南詳舊志同治間僧悟禪益松募捐重建

古竝育菴在青山門內俗名放生池今爲牧牛局

謝龜巢先生祠在子城東偏放生池 國朝康熙六十一年

裔孫嵩齡建大學士劉文恪於義記曰鄉先哲謝龜巢先生生平學宗聖賢言持風化至正間守道不仕明初歸隱橫山卒葬其地自前代以迄 國朝久在祀典橫山有士紳舊建祠宇興壞者再當茲禮樂明備之日而郡城獨闕專祠非所以崇秩祀昭令範也歲壬寅先生十一世從孫司馬公嵩齡循例陳之當事遂建祠於子城東偏寓書來都命次公農部尙書郎旻屬於義爲記緬惟道脈之傳自楊龜山鄒道鄉倡導東南學者始講求濂洛關閩之緒元

志餘

卷四

祠廟

十

季百家爭鳴道南心燈不絕如纓先生掘起其間闢異端崇正學所至引斯文自任其子林孫塏從孫哲出處一秉家法及門陳宮贊濟偕弟節愍公洽尤以道德忠義建標豎穎而先生辨惑立言淑諸人以傳後者閱百有五十年吾鄉徐養齋毛古菴葉古心諸先生篤景賢之懿好翕然羣仰爲宗嗚呼先生之維吾道豈淺鮮歟是則專祠之建又非尋常無與於重輕絕俗之數者可同年語矣謝氏後裔克承世澤一旦衰者興之缺者補之自此崇祠邃宇永奉明禮不且與鶴溪舊築芳茂書臺潞城樵舍同欽高躅於百世下哉於義竊願他日假旋梓里謁先生廟堂瞻棧

桐湖儀型庶可憫中心向往耳祠基與池二畝有奇池爲
里放生處堂寢各五楹門南嚮額曰先賢謝子祠寢後臨
池有榭雲影波光澄虛開遠不減伊洛間意也經始於壬
寅二月卽落成於夏六月例得附書至先生之里居世系
及夫行事之詳史傳具在

東右廡

陽湖城隍廟在新坊橋西詳舊志咸豐十年燬於兵同治十
年邑士民公建邑人湯成烈記略曰雍正四年分立陽湖
縣未及神廟閱三十餘年乾隆丁丑桐城潘君恂來知縣
事見本縣無城隍之神乃議立神祠請於大吏達於禮部

志餘

卷四

祠廟

七

報曰可於是度總司徒廟基購民房而拓之築堂列廡未
竣事歲壬午陳侯廷柱建二堂花廳甲申潘侯來知府事
更闢後宮寢樓體制斯備癸巳三月燬於火邑人亟謀新
之丹堊崇敞逾於舊觀甲辰程侯明憮建齋宿所三楹以
爲祓濯之所道光戊戌邑人捐貲買廟東孫氏廢地二畝
五分建官廳南北各四楹監察司財神殿各數楹闢廟門
南向直通惠坊大街咸豐庚申悉毀於賊同治甲子城復
乙丑設像附於郡廟庚午之夏爰議興復邑侯張君清華
捐廉首倡紳董士庶詢謀僉同集資得四千一百餘緡其
冬庀材鳩工邑人徐子湘等經理其事買廟南呂郭二姓

空地以廓其基芟剔蕪穢築以周垣中建二堂五楹堂之
後建西花廳三楹堂之東書房一間其南建大門三間外
爲照牆規模壯濶而經費不充辛未奉神回轅正南面以
聽治理也祀莊劉二仙師於堂之左右仍舊制也

劉雲山祠附城隍廟別開門於廟巷詳舊志

文昌宮在邑廟內東偏咸豐間寇燬光緒元年重建閣五楹
祀文昌司命閣之左祀老萊子右祀呂祖又右爲惜陰書
屋左爲惜字院十一年增建亭榭差有泉石之勝邑人呂
金誠張黼董之

中右廂

志餘

卷四

祠廟

七

忠義祠在季子廟西詳舊志咸豐十年毀同治七年重建邑
人湯成烈記曰毘陵自古重氣節敦行誼漢彭子揚以來
成仁蹈義炳於史冊者更僕難數矣然而唐代僖昭之際
孫儒楊行密之徒爭據此邦九年之中陷城者十一次百
里內無煙火其間國殤無慮數萬而南唐有宋末閩闈揚
幽光則亦任其湮沒無聞已耳迨乎宋末姚胡諸公以孤
城抗節元兵十萬圍之數重糧盡援絕誓與城碎有明中
葉表彰忠節爰建祠宇此常郡忠義祠之所昉而薛棻萬
人死義錄之所由作也咸豐庚申之春逆餒滔天入我西
鄙北鄙欽風大有棲鸞旌孝通江循理各鄉士民建義而

起與賊戰鬪死亡相繼斂城求援當道不發一旅局紳膜
視不爲之請賊乃大熾陳亡者蓋二萬餘人焉三月末大
營潰和帥奔常與何督偕亡府縣文武官咸走恐後而通
判岳公昌陽湖縣典史孫公錫琪爲在城紳士趙起憚彙
昌曹禾等推爲權行府縣事率士民乘城分堵而守四月
初一日賊大至旦夕仰攻槍礮雨注前者死後者進殺傷
相當閱五晝夜血溢城闔守禦而死者不啻萬餘人初六
日午未間城陷東南兩門入短兵巷接血溢衢路死鋒鏑
者亦不啻萬餘人於時婦女老弱盡義於水者罵賊飲及
者自縊絕食者男婦蓋二三人焉其後鄉人激憤以白

志餘

卷四

祠廟

三

布襄首舉義殺賊至同治甲子王師克復四年之間各鄉
兵死者復四萬餘人焉夫以武陽兩縣士民秉節建義死
者至十萬餘人之多忠義之氣甲於東南蓋沐浴
聖化涵濡既久故能見危授命之死不二事爲千古未有之
奇禍亦爲殺戮非常之慘遂上動

天子之聽履

詔封疆大臣設局采訪而各大臣仰承

明詔歷次彙題迺旌卹之典久頌而享祀之祠盡燬有心

者過祠故墟能不悽愴悲懷慷慨低徊而不能去也哉繇
是乙丑春戊鄉先生李述來謀於成烈曰大難初平瘡痍

未復願贖祠宇鞠爲茂草經營興建工鉅役繁費於何出
吾常仕宦於外監司守令丞倅佐史直省類不乏人儻書
函勸募當必樂從也繇是刊具公啟復備函書徧告直省
知交始於戊辰春二月興工先建享堂三楹兩廡東西各
六楹邑紳又捐錢三百餘緡以助之又勸各行鋪業月捐
凡二年得二千二百餘緡己巳春於祠之東建貞烈祠五
楹其夏於享堂前建維風堂四楹其東一楹祀明尙書知
府李公又明年庚午於維風堂西建倉聖祠三楹其秋於
貞烈祠前建前堂三楹以前節烈祠烈女總牌祀其中而
貞烈婦女之後進者附東西焉其冬始建大門五楹而周

志餘

卷四

祠廟

古

垣具焉至辛未正月閱三載而告成凡糜錢三千二百數
十緡而神臺神龕之費皆取給牌龕之捐不與焉夫泰山
之雲起於膚寸江河之流始於涓滴當乙丑之議建祠也
或曰宜先學宮而後祠且學宮建則忠義孝弟與名宦鄉
賢節孝四祠皆附學宮有司職也何越俎焉成烈曰學宮
宜先府後縣今衆皆以縣學爲言而府尊允之固已先所
後而後所先矣吾常忠義孝弟祠皆另建不附學宮而庚
申死難士民男婦久被旌卹屢奉

明詔捐建祠宇則民捐民辦不爲侵官先事綢繆允爲遵
旨或又難之曰元氣未復誰樂捐輸宦途不測捐廉難必大

工驟興費用不繼其奈之何成烈曰人之欲善誰不如我見義不爲是爲無勇況事非旦夕可成不妨多歷年所乃三年中各省陸續捐寄宦途之捐集而享堂以建又三年各鋪業捐集而全祠以成棟宇宏敞垣墉堅厚塗茨粲粲之工畢施焉然其所以告厥成者誠哉樂善人之多而見義有必爲也爰書其顛末而立之碑

倉聖祠在忠義祠內西偏同治九年建

貞烈祠在忠義祠內東偏同治八年建

節烈祠在貞烈祠之前

史氏忠節祠在打索巷祀史氏男女殉難百二十人同治七

志餘

卷四

祠廟

五

年六月十八日總督曾國藩奏請於常州府城內建造史氏忠節專祠奉

旨著照所請欽此光緒初二品封知縣史致謨建祠屋二十餘楹寶應劉恭冕史氏殉節記曰咸豐庚申夏粵賊竄陷常郡吾友史君翰輔致謨之母趙太夫人等殉節死事聞均旌卹如例於是翰輔之戚友某某爲文若詩以光美之而於姓氏或未之詳爰別爲記如左初翰輔需次湖北封公湛貽先生及德配趙太夫人偕翰輔之妻蘇恭人等里居及賊警日至封公挈長孫悠榮先行太夫人等檢理衣物將謀偕行而賊已入城沿門殺掠一賊猝至持刀向

太夫人恭人見之亟以身蔽姑及其母賊怒刺恭人洞頰
血淋漓恭人喫血罵賊益怒復加刃遂死太夫人得乘間
走免復繕宅後井死死時但呼媳死可憐不置時榦輔之
胞姊適袁績燮者堂姊適汪鈞者堂叔錫純妾葉氏恭人
兄嫂狄氏暨榦輔之兄女名閏生名八姑者皆從入井死
恭人之姊適劉耐齋者袁績燮之姪學丙妻鍾氏俱投繯
死是爲四月六日事也夫恭人以孱弱之軀身蔽太夫人
冀太夫人得不死太夫人時年六十五儼然一老婦既幸
脫免而痛其媳若不惜捐軀報之死生倉猝之際姑不忘
慈婦不忘孝此不謂人倫之至也歟榦輔之次子悠祝年
百二十人已奉

旨准建專祠故居係公宅已爲賊燬他日宦成歸里當于故
宅地建祠堂祀太夫人而以恭人及諸史氏殉難者配此
又孝思之篤所受于家教者然也嗚呼可以風矣

崇法教寺在忠義祠東詳舊志同治光緒間僧鴻祖定仁募
捐重建邑人陸鼎翰記曰佛法足以維世道之衰聖教之
所不行政令之所不及浮屠氏演爲果報之說俾天下貪
愚頑鄙不可格化之徒少懼伏其心佛法之陰翊世道洵

志餘

卷四

祠廟

夫

非淺鮮以觀塔廟之所建焜耀寰宇雖其成壞固乎數不旋踵而興復如初豈非象教之流行昭然若江河不廢萬古者與毘陵古刹以百數城之外天甯爲鉅城之內崇法爲鉅崇法者其始建不可考相傳爲隋司徒陳吳仁後圃舊址在南唐爲大聖院宋初爲僧伽院宣和間賜額崇法明洪武末改教寺寺東南隅舊有鐘樓巍然插雲表鐘聲聞數里故居人又謂爲鐘樓寺云自

國初以來遞有興廢道光中嘗鑄巨鐘而不鳴吾郡湯貞愍公貽汾偶經是寺怪而叩之鐘鏗然大鳴後卽他人叩之無不鳴者人咸以爲異咸豐庚申寺燬於粵賊之亂事

志餘

卷四

祠廟

七

定主僧法昌歸而謀復之未幾而寂當是時諸山梵刹皆灰燼四方參學之士無所偈足有志者盡傷之有可亭上人者戒行精進勇於有爲叢林師子也僉欲以起廢之任屬之可亭讓其位於同袍鴻昶而自爲監院二師殺衣緇食惟日孜孜緇流奔赴施者填委於是始造釋迦殿三楹不數年遂構大雄寶殿同治癸酉鴻昶化去可亭又讓之暨陽十方寺僧戒滿期年戒滿自以不能厭衆望退居故院衆謂非可亭不能主是席涕泣以請可亭遂不獲讓而出世益殫志慮以勤率物以誠感人踰年圓通閣成至是而舊觀殆復其大半矣殿經始於同治庚午二月訖工於

壬申十月閣經始於光緒丁丑正月訖工於是年四月大
殿三楹其崇七尋廣倍之閣居殿後崇如殿而廣稍網楹
視殿之數而溢其二爲三門者一爲前殿者二旁殿者三
爲堂者五凡廊廡登舍藏庫庖湏之屬胥備費以錢計者
若干萬役以工計者若而人可亭以創復之難宜示後人
詣余請記其事余惟寺之重興未嘗有巨室之助亦不書
厯於民間積衣盂之貲以成厥功十餘年間變瓦礫爲樓
閣化樞翳爲金碧像變梵夾莊嚴妙勝法會之盛幾幾與
天甯埒又將謀建鐘樓以符舊制全規之復彈指可期雖
曰運數使然其人得不謂之賢哉後之住是寺者思其艱
隆亦於此可見矣可亭名定仁郡人也

雷祖廟在十八家村同治間里人董誠一集建

東直廂

天甯萬壽禪寺在通吳門外詳舊志寺基國字三十八四十
三四十四四十五四十六號又普同塔院基七百二十三
號共免科地六十四畝二分四釐五毫二絲八忽咸豐元
年主僧悟潔重修邑人莊受祺有重建禪堂記曰粵自正
法東來單提直指四諦同寂五宗斯作掃文字之顯迹標

志餘

卷四

祠廟

六

而圖其永益以究明心性之旨闡揚大法止祝

國釐下濟衆生不特琳宮梵宇厯久彌新而世道之由衰而

權實之微旨示鉗錘於迅機恢真指覺於無量於是廣闢
招提安處徒眾揮謝三有繫心一緣晏坐屏息刻香程候
又復動靜交養行止互策真妄雙消能所並絕蓋以尋丈
之密室而繫廣眾之慧命此禪堂之制所由昉歟常州天
甯寺者負郡東郭翼然聳峙基廣百畝殿高十仞金壁莊
嚴之相構櫺宏麗之規玉墀藻井之觀琳宮邃宇之勝固
已甲於吳會美盡東南又代有名德宗規彌整拈花證以
無言擊竹契其深悟海內開敏之士有不來遊是邦結制
斯寺者輒以爲憾溯由唐代肇建迄於前明迭毀迭興規
制日敝

志餘

卷四

禪窟

九

聖清膺籙象教愈崇

翠華載臨琳琅賁煥則有大曉禪師振錫茲土爰究爰度高
靈四接燦焉各新始規後樓中室爲禪堂俾十方法侶六
時參學其西爲影堂東爲祖堂又東爲功行堂記菊淵源
後先繩步隙駒電逝更越百年棟垣榱桷日就頽壞緇素
千百議將葺治雪巖禪師法名悟潔楚北武昌人也慧鏡
外韜智珠中澈住持斯寺已二十稔以爲祇林不整則清
淨之法誰傳精舍未成則拔濟之蹤奚寄宜去舊易新弗
局俾陋用是伐材於林取石於山徹後樓而重建焉凡成
樓宇三十有六楹其崇五尋有奇增於前者十之一其背

繚以周垣古木陰森虧蔽日月樓之上藏皮經籍左右爲
寮宇若干楹寺僧獲深詣者居之樓以下規制各如其舊
髹堊丹雘務極緻密復於殿左葺小觀音殿樓房六楹計
工一萬七千有奇糜制錢六千數百緡經始於咸豐紀元
之仲春落成於是歲仲冬是役也銖積檀護之施寸蓄伊
蒲之羨權贏劑虛通力合事閱一寒暑而工竣從此入華
嚴之會各證真修升般若之筵盡通密義可謂彈指而樓
閣見舒睥而戶牖闢者也受祺景行初地瞻禮梵天求寶
筏而逡巡仰化城而讚誦羨如雲之傑構欲不日之易成
敢託小文以告來詰司事者爲都監師悟來監院師悟厚

志餘

卷四

福廟

辛

監修師潔蓮宜備書十年毀於賊同治間主僧真禪維那
雨春都監悟來敷溱清月等重建邑人陸鼎翰記曰
聖清受

天命撫有區夏

列聖相承深仁厚澤軼乎前古中外禔福歌詠隆平撫茲二
百有餘年雖間有肆逆頑民而大小臣工稟承

廟謨卽時戡定海夷輯服來賓來王蔚成

中興之治宣光之盛蔑以加焉故事自行省至郡邑所在皆
有

萬壽宮歲元旦令節

天子聖誕長吏率文武僚屬與其鄉之父老恭詣叩祝如朝
賀儀成禮惟謹典至鉅也詩曰躋彼公堂稱彼兕觥萬壽
無疆詩人敘民愛君之忱以見風化之美亦所以報上德
而抒下情也常州東門外天寧萬壽禪寺爲郡邑吏民慶
祝

聖壽之所 國初以來主僧皆一時名德法會之盛聞於遐
邇莊嚴妙勝甲於東南

聖祖

高宗先後南巡臨幸斯寺

奎藻璇題焜耀海內寺僧精修戒行虔祝 國釐與夫祈晴

志餘

卷四

祠廟

五

禱雨甚至且勤他寺觀莫能並焉咸豐庚申粵逆肆亂蕩
爲灰燼今相國合肥李公統師克復城邑善後興建次第
修舉顧以費鉅帑絀皆取給於出畝主僧真嵩真禪慨念
時艱蒿閔凋勳持堅苦卓絕之志以興甚難希有之業先
建後殿次成樓閣堂舍庫藏庖湑之屬四方參學全集棟
宇象變偉特壯麗十數年間殫竭心力未嘗求助於民間
積衣盂之資歲租所入漸復舊規增田數千畝以供食輪
於是郡邑得舉行慶祝盛典吏民熙熙鼓舞

聖世兩場時若年穀比登成膺休祉能無述焉今主僧清如
與西堂真宗都監清月等伐石建碑以識

中興之盛而紀建復之勞垂諸後裔埒書主事諸僧於陰其辭曰洪惟天甯爲古道場利益衆生陰翊

皇綱中丁曠劫灰飛原壑過者靈傷狐城鼠社

景運中興佛日同輝念彼龍象云何依皈粵有比丘發願起廢不資衆因不動聲氣毋怵於難成之斯易鐘魚互荅樓閣見前悟彼成數其人惟賢鞏我

皇圖於萬斯年

按陳府志寺僧紀蔭重建正殿有知府于琨碑記今補錄之文曰郡東通吳門外望之雲樹鬱葱刹竿起天半郡志所謂天甯萬壽禪寺者是也創自唐天復間名廣福宋崇

志餘

卷四

祠廟

三

甯間名崇甯加萬壽政和間改天甯相沿至今明宣德嘉靖間遞有建造 國朝康熙十三年甲寅六月正殿災有三世佛與兩廊五百應真像並爲灰燼越十一年乙丑郡之紳袍許侍御陳中翰龔孝廉輩以寺爲 朝賀習儀之所嘉禮不可行之草莽且左有巽宮樓在郡縣治之東南形家者號爲文筆峯邇來傾圮殆盡以是鄉會兩試獲雋者甚少亟宜興復之便請之前守三韓祖公乃給示勸募庀材鳩工遂以丙寅之正月重建正殿丁卯二月修葺巽宮樓是年登賢書者六人而殿工閱五年未就今壬申夏始得從事於桴筭瓴瓦可望有成士民遽請余記其事夫

記者所以記其成功也功未成而記之者何歟正以難成之功而有可成之幾欲人人知寺之所由名佛之不可不敬功之不可不勉也天甯素以禪名寺者也宗門宙亭上人居之惓惓以殿工難成爲憂一日報余曰近有檀越願續前工詢之則曹其姓卽向之葺玄妙觀者郡人莫不奇之稱爲善人余於此抑不能無世道人心之感焉夫上之教民也教之以爲善則福而羣相鼓舞矣教之以毋爲不善而未必信教之爲不善則禍而羣相警戒矣此釋氏所言果報輪迴能使民欣然慕惕然懼也乃至禍福之說井不能生其豔羨畏避之心此無他亦惟民之窮蹙有以致

志餘

卷四

祠廟

三

之耳常郡自己未庚申之間旱潦相仍田疇蕪穢廬舍飄蕩雖以十餘年之生聚而凋敝未改國賦正供且追呼不甯遂使邀福免禍之情不勝其惜財吝費之尤急於是千載名藍一方勝地往往履丘墟而莫之省觀締造而莫之施嗟乎此類雖可鄙笑而其情亦可矜矣曩歲

聖駕南巡渙頒大號積年逋賦概爲蠲除民免於催征官免於參罰又多出粟帛以資賚高年各上臺背潔已率屬與民保養民生其時者安居樂業有含哺擊壤之娛語云倉廩實而知禮節衣食足而知榮辱將見家給戶足之餘克底型仁講讓之治豈僅以施捨作佛事已哉是殿也始以

千萬人而不足終有一善人而迄有成而幾先見於此洵可記也矣說者又曰寺在郡之東方華嚴以西方表姓東方表命今也鼎新傑構生氣鍾焉上以祝

聖天子龍光鳳歷億萬無疆下則臣工士庶得長享斯世之昇平同遊無量壽海萬壽之名蓋不虛云倡其義者許侍御名之漸陳中翰名玉璣龔孝廉名百藥司其事者宙亭上人名紀蔭得法於靈巖繼公續舉完工善人曹廷俊例皆得書名碑中

東嶽廟在天甯寺東詳舊志同治八年道士王秉生募建三門行宮光緒五年里人姚慈生募建大殿

志餘

卷四

祠廟

五

元妙觀在東嶽行宮東詳舊志同治間住持陳永政重建太平講寺在季子廟西詳舊志康熙四十二年

聖祖仁皇帝南巡

御書太平興國寺額

賜寺僧祥麟咸豐十年毀同治五年僧雪如募建三門光緒六年僧慧蓮募建大殿

孝仁鄉

顯慶寺在周莊詳舊志成豐十年毀今惟鄒之麟行書金剛經石幢尙存完善無損

三官廟在白家橋西北三里許詳舊志俗名三官堂同治間

重建廟後有溫吳二公德政亭

豐北鄉

天宮禪寺詳舊志光緒間僧淨修募捐重建

周文襄公祠在芙蓉圩詳舊志光緒六年里人重建

豐南鄉

潛靈觀在芳茂山麓俗名白龍廟祀龍母神屢著靈異宋紹興間州學正呂喆奏請賜今額明嘉靖間重建有司春秋致祭國朝乾隆十八年知府胡文伯重修自爲記載舊志道光十二年知武進縣姚瑩又修之咸豐間燬於賊同治十一年光緒三年皆早知府吳鼎元知陽湖縣吳康壽

志餘

卷四

廟廟

五

先後詣禱皆應蝗不爲災倡捐重建里人楊以輔包俊等董之十年巡撫衛榮光奏請頒額六月三十日奉

上諭江蘇陽湖縣橫山白龍神素著靈應近年旱蝗爲患疊經地方官往禱立沛甘霖秋成告稔實深寅感著南書房翰林院書扁額交衛榮光祇領敬謹懸掛以答神庥蒙頒御書官廳致和扁額

高慶菴在橫山鎮前街

城隍廟在萬慶巷左同治八年郡人趙贊育無錫陳鴻道里人楊旭藻耐灝等於廟基文昌殿創設惜字會

報慈菴在龍潭西詳舊志成豐十年毀光緒三年僧炳泉募

建

劉猛將軍廟在二十七都五圖咸豐十年毀光緒三年秋有
螟禱於神遂不爲災歲仍稔里人任九臯等募建

大林寺在芳茂山麓紫霞峰下舊志誤入豐北鄉同治十三
年僧光慧性修募建

政成鄉

芳渚禪寺詳舊志光緒元年重建

斗姥閣在戚墅堰鎮詳舊志同治九年重建

長樂菴同治五年重建

忠佑行廟詳舊志同治十年重建

志餘

卷四

祠廟

美

保寧寺詳舊志光緒元年重建

東嶽廟在鄧莊詳舊志同治光緒間道士徐順德里人諸崑

玉等集建

雲西節孝祠在寶雲寺西祀各圖貞孝節烈婦女咸豐六年
建十年毀同治六年知縣溫世京重建

圓通菴在後埭鎮詳舊志同治十二年里人張靄南重建

安尚鄉

麻尹二將軍廟在虞橋詳新舊志兵燬未復有記曰宇宙所
以亙古而不敝暫否而復亨者賢良啟之於其始忠義維
之於其後忠義之士不能使其事之必有濟而惟此不敢

倖生之心乃以常留隕確生生之理吾常城東三十里而
近有圩橋鎮橋之東北數武故有麻尹二將軍廟麻公爲
贛州三砦巡檢士龍尹公爲江西憲將玉宋德祐時常州
失守文文山遣二公往救遇元兵於圩橋麻以戰死尹轉
鬪至五木亦死餘兵慟且憤相率夜戰俱死無一降者文
山所爲比之古睢陽也當是時淮將張全廣將朱華同受
文相國命來援竝遇敵先遁獨二公奮不顧身所向披靡
矛矢蝟集重傷隕命而丹心浩氣炳炳奕奕數百年如可
見聞其廟食於茲土所謂以死勤事者非耶廟之肇建蓋
在前明歲久傾圮則寄其象於三官祠祀事闕如歷有年

志餘

卷四

廟廟

毛

所歲乙巳王君原琳等倡率捐貲重構祠宇以續禋享循
基址甚隘纔可三楹又值旱災物力艱窘賴三君百什支
撐勉強竣工而里中人士解囊相助亦大有力焉蓋忠義
之足以感人也如是方二公之來援也里有周氏二子嚴
氏五子皆彊力絕人左右二公從以俱死緣爲立木主於
二公之旁而孝子若楊若蔣亦竝祀忠孝一理也因人情
之所願而爲之庶幾禮以義起者是役也木石瓦磚灰鐵
之費若干工匠助役之費若干悉鄉人慕義而協力以相
與有成者固當誌其顛末勒石昭示以爲後來者勸時乾
隆丁未仲夏宋文信國天祥吳尹玉詩團練濠州廟贛川

官其二子賜良田西臺捕逐多亡將還有焚黃到墓前又
弔五木詩首赴勤王役成功事則天富平名委地如水淚
成川我作招魂想誰爲掩骼緣中興須再舉寄語慰重泉
明胡文安潑周熙文傳公名縵字熙文周伯忱先生五世
孫也世居晉陵之東鄉與弟簡文俱以文學著然恢廓有
大志當是時宋室陵夷中原板蕩北兵洊食江南公講求
韜略仰天嘆曰高宗有張韓劉岳而不能恢復甯不令壯
夫扼腕因易己字曰思韓弟曰思岳蓋忠義天性然也家
居披甲操戈縛草爲虜刺之夢寐間常大呼殺賊元兵渡
江率鄉兵三百人詣通判陳炤陳守禦之策炤給兵千餘

志餘

卷四

廟廟

天

屯呂城以拒虜由間道圍常州城中守禦甚嚴急不可破
公欲出奇兵襲其後而虜遣阿育吒誘以金幣公斬其從
人馘吒耳虜怒分兵襲公而王良臣以城降公乃與姚讓
徒步詣行在謁文丞相時爲浙西江東制置使知平江遂
僉公鄉導命張全尹玉麻士龍各將兵三千救常州公與
尹玉駐五牧麻士龍駐虞橋前後九與虜遇相持五十餘
日而張全忌功怯敵不發一兵不助一餉致士卒飢甚公
與玉戰死於五牧東赤湖蕩之沙灘全軍無一免者至今
名其灘曰餓死岸土人憐之爲立雙忠祠俗稱雙廟二忠
者玉與公也後人失公主以麻士龍附焉士龍死於虞橋

注垢汀虞橋故自有祠五牧非其死所况餓死岸葬公與
玉至今稱二忠墩後之修志者不考其詳遂致公名淹沒
不著爲可憫耳予故表而出之昭茲來許庶有以慰公於
地下俾後之人知以節義自持未必非培風之一助微特
爲顯微闡幽已也宋文信國天祥常州詩并序常州宋睢
陽郡也北兵憤其堅守殺戮無遺種死者忠義之鬼哀哉
山河千里在煙火一家無壯甚睢陽守寃哉馬邑屠蒼天
如可問赤子果何辜唇齒提封舊撫膺三歎吁

昇西鄉

忠義祠在天井橋光緒二年建知縣吳康壽有碑文曰

志餘

卷四

祠廟

五

國朝自定鼎以來凡勵節之士如歐敬竹石士鳳輩無不褒
獎崇祀卽典史應元閻公及諸生任天祥許用類亦登祀
典懋勛綱維咸豐庚申粵逆竄常督帥官弁先引去紳士
義民數十餘萬城鄉合守四月六日城陷十六日賊掠昇
東侵昇西東界時團董從九品吳元昌從九品吳汾監生
朱太煊茂才姜介義士許麟寶方設局團練勇於天井橋
嶽廟開警禦諸坂上賊退越一日賊至天井橋姜介與吳
元昌吳汾朱太煊許麟珍許麟寶率民勇出禦互有殺傷
姜介長子子連死賊却旋反飽餐俟日晡賊麕至團嶽廟
姜介與眾當門守麟珍麟寶持釜蓋突出斬殺團益密遂

奮躍升屋擲瓦飛如雨賊稍稍解瓦盡賊牽行營礮轟之
姜介全家死吳汾朱太煊許麟珍許麟寶俱死從死者甚
衆吳元昌得不死爲復仇癸亥年死採訪者以事聞於

朝

聖天子以督帥失律官弁不守義士民獨能嬰城堅壁於常
州殉難士民吳元昌格外矜恤吳汾朱太煊姜介各給予
蔭襲有差許麟珍麟寶照新章賜恤義民一例均此其死
難最慘者有力之家准其建立專祠專坊按吳元昌字煥
清吳汾字克昌朱太煊字蘭臺皆急公好義有魯仲連風
姜介字景堂從政鄉人性誠驚力學慕唐介之爲人自署

志餘

卷四

祠廟

三

其名曰介攻帖括出入熊劉家薄腐儒咕嗶留心經濟有
大志麟珍麟寶其徒也粵匪倡亂欲投營効力無由自達
師徒鬱鬱庚申正月元昌延入局相與教習義民計協同
四面鄉團與當道官紳翦滅髮逆爲

國家用督帥走有民無兵諸君子竟以保衛鄉邦忘身殉義
詢足尙矣余蒞任之明年鄉人旣拾其焚餘骸骨埋之復
於嶽廟旁籌資樹忠義祠四楹設六君子牌位及從死之
有名無名者遵

旨春秋請祭祠基爲被字八百七十九號鳩工於光緒元年
二月竣於二年五月余給扁額楹聯外特爲紀其歲月鑑

諸麗牲之碑嗚呼我

朝恩澤誠論浹人之肌髓利不庸殺不怨也哉間嘗盱衡往
代常州兵燹莫慘於宋元兵至常郡守趙與鑑先遁郡人
錢嘗以城降劉師勇復之兵繼至王安節守之自夏徂冬
拒守數月城破官民盡殺僅留七人而城外無一鄉團相
與拒禦死如六君子者故鄉間罕有忠義祠五牧之忠義
祠祀麻尹二將也二將列十八人位以其戰歿於此特為
敕建專祠他無有也庚申之變義旗四樹六子亦奮袂起卒
效死今以

志餘

卷四

祠廟

三

皇朝褒崇祠祀千秋不其禱而妥為之銘曰碧落天井星斗
夜驚忠魂月照力果心精浩浩落落正氣流行食毛踐土
報國丹誠

天子嘉之

敕賜褒旌春秋筮日薦以牢牲一時千載為傑為英

定東鄉

祠山廟舊名昌福廟在曹壑東詳舊志同治五年重建

玉都廟在遙觀巷同治八年僧普濟募建

定西鄉

端明寺在德安橋南詳舊志同治光緒間僧寶昆德潤募捐
重建寺基豈字五百七十號免科地十七畝四分五釐

永寧禪院在湖蕩橋雍正間

御賜海月騰輝扁額咸豐十年毀同治間里人江麗峯何桂蟾僧蘭君募捐重建

華陽道院舊名華嚴教院詳舊志同治九年重建

文明寺一名三渦寺詳舊志同治六年里人蔣殿懷僧普靜募建

降子廟在降子橋南詳舊志同治九年重建

灌墩菴在灌墩詳舊志里人蔣炳重修記曰里有小蘭若曰灌墩菴相沿基桑棗地乾隆七年郡建育嬰堂欲收其息里民具呈乃免歲久傾圯主持謀鼎新之乾隆二十三年

志餘

卷四

祠廟

三

冬集衆捐貲重修較舊略宏做因郵圖於京以乞記於予予喟然曰

聖天子崇儒右文百餘年來蔚爲國華者無不煥煥炳炳爲名教主持卽或抱負不凡而才與命仇亦皆敦飭倫紀誦詩讀書以鳴國家之盛今不創鄉學而斯菴是修不亦可以已乎抑又思之我朝重熙累洽休養生息凡踐土食毛者各安生業耳聞目見不出方隅非有啟迪之其何以善後故當事者有憂之恪遵功令鄉立約長俾朔望集鄉民於公所宣講

聖諭務使家喻戶曉而後已今斯菴之修也意在斯乎意在

斯乎誠如是則耳漸目染將見父與父言慈子與子言孝
出負耒而入橫經恂恂粥粥敦睦成風是雖釋象也亦振
教之地矣遂書寄刻石以問諸里之耆老當亦不以予言
爲河漢云咸豐十年火於兵同治八年重建

普濟寺詳舊志同治間僧懋堅募建

永慶寺詳舊志同治十年僧恒修圓明募捐重建

崇勝寺詳舊志光緒五年僧普照圓明募捐重建

延政鄉

祠山殿在游塘橋東詳舊志同治九年里人許榮寶重建

寶林寺詳舊志同治八年里人白雲槎等重建

志餘

卷四

祠廟

三

府城隍行宮二一在曹溝橋載舊志一在周昆橋俗名烏龍
菴同治十年盧洪賚重建張阿川於菴內建惜字爐

惠化鄉

至聖祠在寨橋元至正間聖裔湖州路儒學教諭孔克心占
籍居此始建 國朝雍正十一年孔繼岐請帑修葺乾隆
六年援例免科廟基難字二千三百九號平田五畝四分
六釐三毫兵校祠宇被毀未復

關帝廟二一在寨橋同治十年里人錢通如來如燦如集捐
重建一在雲臺里均詳舊志同治八年重建

鳴鳳菴舊名永甯菴詳舊志同治間里人虞旭初王景成倡

捐重建

祠山堂在廟巷同治五年里人錢安信薛士洪楊春茂等集捐重建

延濟菴在蠡塘同治八年里人王濬川蔣清河蔣萬榮集捐重建

劉文清祠附猛將廟在寨橋鎮光緒二年重建

建昌寺在鸚鵡渡詳舊志同治七年里人石亨復殷信隆錢安信劉翰清集捐重建

圓通菴在寨橋鎮同治十年僧量海里人潘南英吳步山集捐重建

志餘

卷四

祠廟

三

西方菴在塘洋橋北同治二年里人錢源興朱洪昇募捐重建

從政鄉

東嶽行廟在運村鎮西同治九年里人關功懋姜聽大募建關帝廟在華渡橋同治六年里人周鶴皋募建

新塘鄉

洋移廟在雪堰橋鎮北詳新舊志同治五年里人吳文光王衡集捐重建後殿增建東嶽行宮郡人陸鼎翰記曰天地從何心哉易曰天地之大德曰生天地之仁氣在東方震而出益之六二曰王用享於帝吉帝天帝也生物之主

興益之宗天生萬物則必於震出之故天地之生氣於方
位爲東而岱東方之山也道經曰五嶽之神分掌世界人
物又曰岱爲羣靈之府主生世界人民今世東嶽廟祀徧
寰區非以神主宰生民而崇奉之歟舉世俗荒誕不經之
說固不足信而大聖人著易皆本乎天地好生之心導民
於善而神而明之之道於言帝言震蓋可徵焉吾邑東南
新塘鄉濱太湖其市鎮曰雪堰買居賈舶集焉其民人多
禮讓而好善於振荒卹貧修建寺觀諸善舉靡不樂輸恐
後故其民俗視他鄉爲優而事亦易集距雪堰五里許曰
洋湖村舊有東嶽廟規制宏敞遐邇崇奉香火勿問一毀

志餘

卷四

祠廟

三

於寇亂鎮人吳文光玉衡二上舍慨然以興廢爲己任謀
於衆而將復之僉以其地村居寥落奔走勿便遂議於鎮
之北洋移廟故址廓而侈大之以建行宮洋移廟者南朝
梁晉陵無錫令吳許二公爲民禦災而死鄉民卽其地建
廟祀爲社者也衆謀悉協爰始鳩工經營於同治三年告
成於光緒元年前五楹中闢爲門左祀猛將右痘司其後
五楹祀吳許二公又後爲東嶽行殿其上有樓供奉玉皇
其左右鐘鼓有亭其兩廡爲偏殿各三楹祀東西平王其
他庖湑庫藏齋宿之所稱是輪奐崇閣麗髹陸離其費則
取諸鎮商月輸而歲會之用克歲事皆二上舍之力爲多

而道士周洪培亦與監役之勞焉鄉之人允宜體天地生
民仁物之德益孜孜於爲善神與厥福民物豐阜風俗毗
乎隆古將由一鄉而推之郡邑天下豈非大聖人治易之
心哉

陸聚岡先生祠在雅浦 國朝康熙元年建祀明鄉賢湖廣
善化知縣陸南陽子太子太傅贈少保謚端惠完學孫福
建福甯兵備道布政司參議卿正附光緒三年裔孫鼎敷
增建享堂

蓼莪寺在黃嬰嶺始建失考俗譌爲王孝子哀墓因以得名
枕山面湖幽邃雄勝明永樂時有僧寮百餘緇流雲集隆

志餘

卷四

祠廟

五

萬間僧瑞雲自龍池至振興之 國朝順治初恒一增建
康熙元年不虛戒如踵修之有尙書江陰張有譽記載舊
志乾隆三十五年白峯嘉慶十六年昇明明徹遞修松桂
鬱秀皆數百年物多名流題詠凡有興作鄉之龔陸二姓
助之咸豐十一年悉毀於寇同治間天華重建

慈雲禪院在龜山北麓下俗名南菴舊志誤爲北菴而以壽
昌菴爲南菴同治四年僧近善重建楊龜山先生祠在寺
內見古蹟

觀音殿在龜山頂光緒元年僧紀興重建

迎春鄉

神駿寺在秦履峰麓唐貞觀間杭州將軍暉施宅爲小靈山開法於元奘弟子窺基爲相宗慈恩第一世至性宗六世湛然初住是寺多著述優詔不起追贈員通尊者宋大中祥符中改祥符禪院宣和四年升寺元末毀明洪武二年行暉重建宣德十年天竺僧智瀾起廢舉墜種松六百萬株巡撫周文襄公忱郡人胡忠安公燦助成之正統十三年賜大藏經五千四十八卷金字華嚴經一部敕曰朕體天地保民之心恭承皇曾祖考之志刊印大藏經典頒賜天下用廣流傳茲以一藏安置直隸常州府武進縣祥符寺永充供養聽所在僧官僧徒看誦贊揚上爲國家祝釐下

志餘

卷四

廟廟

三

興生民祈福務須敬奉守護不許縱容開雜之人私借觀玩輕慢褻瀆致有損壞遺失敢有違者必究治之忠安有記載舊志瀾歿其徒大用梁天霖淨大川洪普門安遞繼其席嘉靖三十年梁弟子德乘復建大雄殿增置田山有朱昱記崇禎四年移於西南三峰藏弟子洪儲開臨濟宗法席著祥符語錄 國朝康熙初海陽蘇子荆輸財重建三十九年

賜額神駿自儲後主是寺者紀蔭最知名累蒙

召見

賜予稱疊咸豐季年毀於寇今惟

聖祖御書墨蹟及

賜硯尙存寺屋僅餘天王殿庫房香積厨 宋許琮宿寺詩
一枕松風入夜寒曉窗殘月隔簾看夢回竹榻聞鐘後悵
絕浮生出世難還念將軍能捨宅何妨陶令未之官此身
合向山中住邱壑出來號易安徐震初游寺有感只今初
到祥符寺始慰當年嚮往賒松柏迭迎居士駕湖山旋繞
法王家兩宮北狩今安在九廟南轅祇自嗟爭似山僧多
不管一盂一衲駐年華明劉基晨詣寺上馬雞始鳴入寺
鐘未歇草際起微靄林端淡斜月僧房湛幽寂假寐待明
發松徑斷無人經聲在清樾胡澗都中送瀾公領劄還寺

志餘

卷四

祠廟

表

新承華剝下神州去入叢林第一流惠麓暫留淹卓錫夫
椒終日望歸舟翻經臺上花飛雨說法巖前石點頭七十
二峰秋色好儼過竹院伴清幽清曉都門雨乍收上人遠
出大方游數朝松向窗前偃一葉蘆從江上浮放蹟自耽
雲外趣匡宗不爲利名謀遙知到日談空處頑石無情亦
點頭秦金送淨公領劄住山天上歸來好事僧袈裟光照
佛前鐙塵緣已卻尋常債祖法應參最上乘湖水隔簾秋
渺渺寺松交蔭晚層層吳山乃說夫椒勝絕頂應須我一
登杭濟送淨公歸山寺門秋水隔蒼烟千里歸心有夢懸
江上孤舟初話別天涯一鉢且隨緣逢人漫說無生偈入

室應參最上禪疎竹長松湖畔路相尋法社定他年夏言
題寺松百盤雲氣入千峯飛蓋行穿夾道松長書風雷驚
虎豹半空鱗甲舞蛟龍湖濤夜合秋聲壯山雨春添黛色
濃欲藉丹青圖直榦悵無章偃得相從錢孝題靈山刹昔
人施荒邱作寺靈山趾殿脚插入湖浮圖半空裏波玉搖
簾櫳嵐霖拂窗几景物真丹青牛首麓山比輦絢餘千年
中間頽隕圯爰有再來僧杯渡錢塘水跣趺十笏房殷勤
重修比山門種種新諸佛生歡喜手植松萬株漫山野烟
紫緇流振宗風鐙鐙傳不已祇園去草堂一經將十里清
風獨杖藜往來無盡意許鼎臣過祥符寺竹院鐘涼春已

志餘

卷四

廟廟

五

深殘紅亂點綠苔陰松花滿地無人掃一片閒雲繫野心
國朝釋紀蔭寄許青嶼侍御陳椒峰中翰名山執帚菊花
天來宿松根一夜禪人徑點頭知塔影

甲寅八月夢人持
贈一軸開見古塔

及入山松際塔宛然到門摩頂認松烟湖光淡處鷗先在

漁唱高時雁未眠七十二峰空翠落珊瑚竿斫綠陰邊淨
螺一點傍漁磯世業先宗寄託微水乳許詢投自台雲山

支迥竄應非攀帷事業歸吟卷

侍御按三秦
有攀帷行記

密圃風流詠

息機

中翰築密圃
接進其內

松鶴待余知已久湖濱鷗鳥豈相違此

中應不到風塵草木林巒入望新一日雲山惟有我千秋
旗鼓豈無人幾灣流水桃花渡十里晴湖楓葉津極目烟

波縹緲處相將杜若采芳晨徐騰暉秋日過寺爽入湖山
是處秋爲因訪道更尋幽千竿修竹森森蔭一道寒泉活
活流孤塔影從雲外落清鐘聲在樹間留到來頓覺忘塵
念不願隨人學貴游陳玉璣與損園上人尋幽度林薄中
椒歇微雨餘暉浮蕩漾寒裳涉河澣興矚捫煙蘿遐情寄
石乳珍禽不畏人相看拂翠羽仄徑恍窮流哀湍飛別壑
遵步游東峯歸雲靜如許迢遞引鐘聲松關半猶戶香臺
耽憩游芳蘭恣攀取物我無定觀皓月正微吐陳履儀祥
符卽景古寺探幽景倍妍澗聲四合小橋邊苔裊積翠如
無地松幙遮空別有天半塔山光羣鳥入一亭湖影亂帆

志餘

卷四

祠廟

單

懸到來不覺塵心斷欲向枯僧學坐禪惛格與損園和上
訂湖山之約幾時晴屐上山椒潑墨虛堂破寂寥七十二
峯應待我許將烟翠染輕綃陸黻恩游寺詩探奇入招提
訪舊得初地嘉名草祥符古刹錫新宇幽篁森道周長楸
夾門植苔漬澗疑滄石壤徑猶隧悲彼千歲姿立死失蔽
翳斧斯者誰人芻薪用供饋入門龍象顏古佛半折臂循
牆覓舊題剔蘚讀銘記側足立焦邈荒厓詎堪避坐久松
風吟竹篔寒泉駛以彼天籟鳴如揮勞者淚幸有山氣佳
不改向時翠悠然悟成虧古今殊一致許棫和詩連峯走
松嶠山色不到地雙澗浮野花蕭然有仙意詩僧昔何寵

奎藻錫新字緬懷二百年祖澤久霑被衣穢傳南宗名藍石
火駛隨嵐一迅埽德水渾欲澌堂涂碎令號風樓交經術
僧難挺走險壞佛紛可憐陸子雕虎才欲覘荒厓避慨然
念劫塵懷古有深寄我生沒世紛夙抱雲壑志病廢號半
人窮居乃多忌直須祝宗祈時揮阮生淚覽君勞者歌如
獲楚人恭願隨天隨子唱和吾生遂與廢彼外凋卓哉當
洽裏又游寺二首夾徑蒼落日色殷松杉影裏有僧還一
鐘喚瞑清於水萬竹搖空綠上山古澗花香浮茗盃夕陽
樵僮赴柴關安禪儘有維摩室欲乞人天一味閒亂山飛
翠落檐前靜裏經聲太古妍神馬來當三萬里祖龍去已

志餘

卷四 祠廟

聖

一千年湖雲浩浩無今昔佛日荒荒有變遷布地有金懷

祖德遺容敬展一悽然寺田爲遠祖定宇中丞所施寺有公畫象

周文襄公祠在神駿寺文襄撫江南嘗至山築隄禦潦置田

帖役僧智瀾請象祀之

晏公祠在耿灣寶林菴俗稱觀音堂康熙間建同治元年毀

十年重建

水平王廟在分水嶺詳舊志同治十二年重建

劉龍圖祠在水平王廟詳舊志今廢里人設木主附祀之

真武行宮在勝子嶺明嘉靖十九年里人邵德建三十四年

倭擾洞庭將北渡忽反風倭不得濟民以爲神佑邑人鄒

之麟書反風禦寇額咸豐間賊據山憚神靈威不敢毀
棲雲菴在檀溪詳舊志今圯 國朝許棫詩東湖山色一庵
朝古刹棲雲鎮寂寥石壁窅空因架屋樹根橫澗卽成橋
圓茶香娛宜泉冽杜筍天多勝酒澆產茶筍多名泉經卷木魚禪
誦了劫塵六十可能消許衍熙詩湖光醉游人雨霽清暉
膩颿影破溪烟灘聲確嵐翠遠見古木森揭籬入孤寺禪
幽鳥侵人院荒佛卧地白雲養鐘聲青山足僧意山叢雖
云麤澹泊非世味夕陽滿歸途山童荷樵至

國家祠祀之典其自大祀中祀而外郡邑之所祀一準於
禮經以勞定國以死勤事雖時有增設要皆其生平大節

志餘

卷四

祠廟

三

炳如日星及有功德於民者垂爲令典掌於禮部綦嚴且
慎非此則爲嬪爲媼比於淫祀法所宜禁吾吳自湯文正
公奏毀淫祀以來其風稍稍革然釋老之宮鄉曲壤僻所
在恒有僂指難記舊志所載已失之媼兵燹而後瘡痍未
復物力殊艱而好事者流假神道設教之說集資興建封
殖之家卽不勝其慳嗇之情而語以媚神求福輒色然景
從施捨恐後其僅僅自給者或怵於勢或係於情莫不疲
於應命司其事者賢愚雜廁甚或頭會箕歛肥及私橐神
而有靈不甯厥居不饗爾祀矣矧其爲淫昏之鬼耶志餘
之茸以補新舊志之缺略而各鄉乘訪恒詳略失當祠廟

之重建者所采以百數且有前志未載者而又不詳其緣起茲之所列以非正志姑從寬濫後之輯志者於此當首列奉文特祀次及里社所祀鄉賢忠孝節烈諸祠以明崇德報功之義至夫琳宮梵宇惟載唐宋以前所建名利及國朝蒙

賜

御書扁額者又次及有名賢古蹟前哲詩文之可傳者自餘悉予芟削庶乎不背禮經而亦未始非辨惑正俗之一端也

以上陽湖

志餘

卷四

祠廟

三

志餘卷四

祠廟補遺

子城廂二圖

先賢祠在武進縣治東詳舊志明萬厯間建傳是堂南京吏部尙書吉水曾恭端同亭記曰傳是堂隸毘陵郡治歐陽使君復龍城書院故址卽其地建祠祀延陵季子而下六十有九人朱侍御公以閱汎至見而趨之爰命今名蓋取韓子贈文暢序中語也與使君意合使君因遣使來徵記曰願闢傳是之義以詔此方之人士不佞學不聞道其何以副使君之委惟有德意不可虛辱請爲諸人士試言之

志餘

卷四

祠廟

一

夫自剖判以來言道統自堯舜始堯舜之言道統自允執厥中之語始是中也卽惟皇降衷之恒性純粹至善不偏不倚合智愚賢不肖之所同具在父子爲親在君臣爲義在夫婦爲別在長幼爲序在朋友爲信率之爲仁義之道而性所由顯修之爲禮樂刑政之教而道所由行自二帝三王以逮周公孔子孟軻聖聖相傳作君作師繼往開來裁成輔相之業皆本之此亦猶家之世嫡相承雖累千百業不可得而易也世降俗衰百家之說競起雖莫不各有所授然其大旨支分派別不得以亂吾世嫡之傳若蒼素然至佛氏之徒出竊取吾儒之微言以文其自私自利之

意蓋幾於瀆宗矣韓子闢之說者謂其與孟子距楊墨之功同有以也夫韓子之闢佛其語不啻詳矣而莫近於所以告文暢者何也蓋百家之說與楊墨之教其意淺其辭錯出而不馴固易辨也若佛氏之旨精深而宏大開者既多貿焉莫知其似是而非之害而其出離生死之說又足以聳動羣情而誘之使趨一旦欲其返而歸正如徒舉精深宏大之旨與吾聖道毫釐千里之謬者噉噉置辯有悍然不顧而已故韓子之語暢第言帝王仁義之道禮樂刑政之教所以覆冒斯世而林林總總皆得安居而粒食優游以生死不至於爲夷狄禽獸之歸使其聞而爽然自失

志餘

卷四

廟廟

二

庶幾迴其轅於吾儒也此韓子之善言聖道卽謂功配孟子可也今天下道術大裂士之趨佛者方自謂闢其窾奧牢不可破紛然而未已扶世衛道之君子往往憂之是宜侍御與使君有味乎韓子之言取以名堂也與雖然三代以後明道之學直接孔孟之傳者明道常讀韓子之言謂不知其言所傳者何事豈以二帝三王以來其所以傳者韓子固未之及與蓋明道之言曰聖人本天佛氏本心夫惟本心必至遺倫棄物與世了不相涉而後無礙其空體夫惟本天必至盡倫盡物條貫通融而後克全其性真此聖道與佛氏毫釐千里之差必不能強而同者學者卽此

求之其於聖道之所以傳思過半矣毘陵三吳奧區自子
游踰江蹈淮從游於聖人之門南方之學得其精華者莫
如此地乃數千年來其能紹明聖道之傳者可指而數也
不佞頃入白下側聞毘陵諸學士大夫方修朱陸之會以
倡明道脈而傳是之堂適成於其時事機之符合其感動
興起當益易繼自今登斯堂者無忘賢師帥嘉惠之意卽
名堂之義以根極執中之傳相與修身繕性舍曲徑而履
康莊無媿聖門之世嫡異日者出則以身行道爲名臣處
則以身鳴道爲眞儒將一方人文之盛埒美鄒魯方駕濂
洛無難者其於延陵以下諸賢何有哉斯使君所爲拳拳

志餘

卷四

祠廟

三

屬望於諸人士之意也 國朝同治間重修

河南廂

蘇東坡先生祠在西瀛里詳舊志宋晁公武有記教授余申
撰碑陰見舊志金石類嘉定十四年教授余申撰祭文刻
石祠壁明知府施觀民重修記曰予旣分祀龜山東坡而
記龜山祠矣僚友素字任君邦實謂予曰二先生德業文
章炳炳宋室誠所謂美言可以市尊行可以加人也夫旣
同新其祠記胡可以獨缺予惟東坡以蓋世之才負不羈
之行遊謫所至名山大川歷覽幾徧而於陽羨獨寤寐不
忘焉觀其乞居宜興兩疏情詞懇至乃知先生之神無一

日不在荆溪上下則世祀於常固宜子聞其在宜興也以
五百緡買宅一區夜聞老嫗之哭竟返其券而不責其直
蓋終身無容膝之地客死郡城顧塘橋逆旅以斯高義卓
行視身所經營者且棄之如敝屣矣况身後之崇軒采椽
又何足爲有無哉然則斯祠之新吾守土者崇報之禮實
然要非先生所急焉予又聞先生當神宗時與伊川議禮
不協而二氏在朝門徒互相詆訕致有洛黨蜀黨之號則
其徒之過也於二先生乎何尤夫龜山不稱程門高弟哉
黨議方興日講學建口晉陵間未嘗有一言及者則公與
東坡固無幾微憾也乃同以遊寓之蹟爲邦人士所景仰

志餘

卷四

祠廟

四

同祀於西城隅今雖分爲專祠而勢相密邇僅隔步武許
精神聚會之間追視往事奚啻如夢蕉鹿亦足發一笑矣
嗟夫世衰道失士不以懷居爲恥苟可以美其宮室者雖
能不受嚙蹴之食竟於無禮義萬鍾甘昧隱忍焉而以勢
利相擠者卽一言不合至於落井下石不少顧惜則傾危
之俗所由來者舊也先生困躓於時轉徙南北以詩酒山水
自娛視身外之物略不介意雖與伊川不合亦一時議
論意氣耳未嘗有互相傾陷如牛李輩所爲者其度量卓
越於人不既遠乎故山前觀之則高堂數仞崇當身之奉
者可以愧矣由後觀之則智許相攻結當身之怨者可以

已矣是則先生之行足以師世範俗於方來者爲可記也
任君以予之言有裨世教因鑄之石以示乎聞先生之風
而興者永爲楊氏世守云 元方回過毘陵謁東坡祠詩
至和嘉祐政途開老鳳將雛出蜀來父子聲名天宇小弟
兄筆陳海潮回岷峨一氣鍾山傑杜富諸賢得異才二百
年來拜遺象堂堂直氣尙崔巍

楊龜山先生祠在朝京門內詳舊志明嘉靖間卽其地爲道
南書院旋廢 國朝康熙間重建明毛憲謁祠詩拜謁令
人仰斗山延平無復道南還乾坤浩蕩名難泯廟宇荒涼
地自聞道學千秋流海外書香一岷在人間當時立雪盈

志餘

卷四

祠廟

五

三尺心與程門氣化關邵寶郡守陳虛庵建道南書院書
堂新建古城陰巨榜高題屬意深吾道北南還一岷斯文
今古本同心妙從活水生時得樂向光風起處尋教思無
窮歸有道朱弦休歎少知音

詩見容春堂續集陳
府志作毛憲所作誤

靈官廟卽五顯王廟在前河南詳舊志兵後重建光緒十年
邑紳憚光業等集捐增建山門樓九間東西廡樓房十二
間戲臺一座費錢三千七百緡有奇

西門直街

永甯律寺在運河北俗名所橋庵兵後重建舊志誤作禪院
大有鄉

神墩寺舊志載明唐永州瑤遊寺詩誤作唐黃門賁

通江鄉

先賢商子祠在水塔口詳舊志 國初武進知縣王元烜記
曰祀典凡先賢專祠有禴嘗兩祭者皆因其子孫既爲祖
考立廟又請於禮官故得秩祀不特爲其子孫者得盡報
本返始之意而所以崇禮學興教化有關於風俗人心者
匪淺鮮也獨晉陵商氏有先賢須昌侯專祠春秋祀典至
今缺焉嘗考孔門七十二賢商氏有二商子邾平侯諱澤
字子季魯人禮殿圖躋之曾氏子與之右而僅列姓名其
生平言行俱未詳商子須昌侯諱瞿字子木亦魯人少孔

志餘

卷四

祠廟

六

子二十九歲受易於孔子年三十八歲未有子孔子爲之
筮曰逾四十當有五丈夫子果如其言亦爲孔子玩易曰
子有聖智而無位孔子於是歎曰天乎命也鳳鳥不至河
不出圖吾已矣夫又語梁子叔魚俾不棄其室亦得嗣須
昌侯之生平言行其大略蓋如此又考蜀志云先賢生於
瞿上爰名瞿蓋蜀人也或長而遊學東魯因占籍焉故家
語史記皆繫於魯而歷代從祀聖廟東廡第四而晉陵孟
濱之有專祠何也蓋宋南渡時須昌侯子孫散居滄安晉
陵雲陽間越之滄安蓋明三元文毅公輅其裔也若晉陵
雲陽一派自元介蹊公琦以省試第一殿試第三入中秘

由雲陽徙居晉陵爰立家廟於孟瀆之水塔口以祀始祖
須昌侯譜牒亦公手撰後人固當以介蹊公爲繼別之宗
而公第三子光輔始居水塔口則當爲繼禰之小宗顧不
必別立宗祀者爲專崇始祖須昌侯以奠祀典之光也其
長子光庭一支居雲陽之五戍次子光祖一支居晉陵之
溫墅皆去水塔口十餘里而近禮曰繫之以姓而勿別綴
之以食而勿殊則所謂尊祖敬宗收族之義胥于是祠繫
焉余蒞茲土嘗過其祠櫬榭崩圯風雨侵剝詢及祀典委
諸草莽不禁喟然歎曰先賢俎豆有關風俗人心者衰敗
至此曾不若二氏之宇及諸淫祠競施金錢輝煌丹堊祭
賽禱祀之無已時也亦獨何哉今

志餘

卷四

廟廟

七

朝廷右文重道崇尚理學於周程朱張諸先儒

御書祠扁表章榮寵春秋祀典厥有司存况須昌侯親炙聖
門倡明易學者乎爰是申請各憲臺爲舉春秋秩祀以光
專祀之饗併薄捐奉資修復其舊觀扁曰洙泗易宗而倡
義振興耆誰商氏子孫鼎鑄錕諸耆士也奉祀者誰孝
子慈孫商之躪先賢六十七世嫡裔也遂爲之記勒諸石
以爲不朽以上武進

左廂

先賢梁子祠在登省巷祀孔子弟子千乘侯梁鱣詳舊志宋

張九成敕賜梁少師縉雲侯祠祀田記見舊志金石 國
朝咸豐間兵燬同治間重修

中右廂

季子祠 陳張正見行經季子廟詩延陵高讓遠傳芳世事
移地絕遺金路松悲懸劍枝野藤侵廢井山雨濕落碑別
有觀風處樂奏無人知宋梅堯臣詩信如季子賢自昔知
能幾依約有荒祠寂寞無奠篚壞梁生濕菌古木馮山鬼
英靈豈顧茲青史辭疊疊又夫子篆詩季札墓傍碑古稱
尼父篆始沿春秋義十字固莫刻磨敲任牧童侵剝因野
蕪嗟爾後之人萬言書亦淺袁默季子廟詩巢由高風不

志餘

卷四

祠廟

八

可及後世家邦背子襲東周不競諸侯彊中原未許干戈
敢修盟歃血血未乾稷草離離戰鬼泣闔廬釋楚夫槩奔
公子糾殺桓公入兄弟之間甯固多且正衣冠暮成執前
規舊轍不遠人嗚呼季子其肯立吳民猶有德吳心廟貌
相望在封邑懷古今人憶慘悽日落疏林風習習石祖文
詩夫子南遊不到吳殷勤題識寄嗟吁干戈擾擾憐諸夏
季子流風過耳無元薩天錫詩公子不來春草綠故宮禾
黍亦離離佛源尙有千年井古篆猶存十字碑去國一身
輕似葉歸田兩鬢細如絲李家兄弟一朝暮羞見延陵季

子祠

正覺教寺在崇法寺西 國朝咸豐間寇燬同治間建後殿
三楹 元薩天錫正覺寺晚歸贈益山長老粥魚聲已罷
日暮掩柴扉送客月在地出山雲滿衣燈明聞犬吠松暗
見螢飛深夜長廊盡多應獨自歸

東門直街

東嶽廟 明正德五年郡人陸鏊記曰州城東不一里有東
嶽廟郡太守每歲帥僚屬耆民迎春於此其肇建歲月人
民無從考突獨二古杏霜皮溜雨黛色參天非一朝一代
之物廟之從來因可槩見成化末禳廟屋摧壞宏治己酉
道流沈雲泉謁予先君而告曰嶽廟屋壞請公倡之先君

志餘

卷四

祠廟

九

慨然許諾繼者輻湊暮年而事集正德丙寅摧壞益甚不
堪風雨沈雲泉懼無以安神棲焚香祝天矢志修葺遠近
聞之而傾心施予者視前殆倍蓰焉於是聚材之良誠日
之吉鳩工僦役完舊增新匠勸工競並手偕作傾側者正
朽腐者易闕略罅漏以補以塞黝堊丹漆以法以式仍以
餘材鼎建儀門三間川堂三間后殿三間侈宏規於往昔
立偉觀於方來真勝事也耆民汪慶生輩實克相焉載事
於丁卯之四月訖工於庚午之二月而屬予爲記予惟先
君嘗有意於斯廟故不敢辭嗚呼泰山巖巖魯邦所瞻惟
魯侯得以主之祭之今江淮州郡在在立廟何耶蓋廟雖

在魯其神未嘗不流行於天下譬如水之源泉雖有定在而支流則放乎四海也若謂威靈徵應何如累朝封詔載之詳且悉矣譬其修建歲月以垂不朽云 嘉靖三十五年重修江陰陳崇慶記曰東嶽泰山之鎮奠於齊分是爲岱宗其山雄據寰區登之者俯視天下如培塿然厥神洋洋厥靈赫赫我 國朝崇奉之典比昔加隆以故殿宇之靚麗香火之繁昌甲於四鎮由來舊矣惟是三吳揚州之域爲南嶽分野我民人宜祀之也今祀不於南衡而獨於東岱何居蓋東爲青帝其星躔爲元枴以生育萬物爲德而神之所好專主於仁是故在唐開元有天齊之封在宋

志餘

卷四

祠廟

十

祥符復加以仁聖之號良有以也矧夫神之在天下如水之流行於地無念不生則無往不著無物不長則無地不存是神之於吾人也爲有情而吾人祀之也爲報德禮也非過也而奚限於地亦奚論於時耶吾常東郭故有泰山行殿隋唐以來建於元妙觀與太清並位後燬於兵燹逮入 國朝居人特立之通衢以昭專祀先達廉憲趙公叔成大書東岱岳府榜於山門自後旱澇癘疫有禱輒應人爭趨之闐闐如堵由茲顯異揚英洋洋赫赫仰瞻斯殿真若在齊魯之墟矣夫何歲月遞遷歷年旣久丹青剝落榱桷傾圮而部下諸司雜處殿中殊未稱尊崇之意里之善

類陳全黃岳汪正裘徊廡下重爲惕然迺秉虔鼓義白之
有司聞之當道告之士民聿鳩迺工聿聚迺材經始從事
遠邇聞之趨役赴工子來恐後由是前有重門后有寢殿
左右有兩掖東西有諸曹內有臺廡外有井道煥然鼎新
一改其舊而附奉者爲瘟部爲茅君爲輪藏爲十王而碧
霞元君衛房聖母四岱太子別有主殿東平西齊眞君侯
王各有耳殿並得正位以享一方之祀以應萬姓之所祈
歟休哉殿旣成耆壽錢繹介其善類過余山中請言爲記
余惟子不語神而非鬼之祭則以爲諂夫旣專以嶽神爲
尊俾民得報生育之德固其所也而諸神之附無乃褻乎

志餘

卷四

廟廟

七

蓋神一也有主於生育者有主於殺伐者祀生育之神所
以起人之向善也祀殺伐之神所以警人之懼禍也善心
生以示勸也懼心生以示戒也善則勸之惡則戒之並行
而不悖也傳有之聖人以神道設教固吾儒之所不廢也
況能識幽明之故而窮生死之說其於流風習俗豈曰小
補之哉是役也始於嘉靖辛亥正月訖於乙卯十月歷五
載而告成首倡之徒協從之衆皆知惠迪之吉作善之祥
書咸得附書列於碑陰

圓妙觀詳舊志

國初地康熙十年郡紳孫自式卽其址議

復建出千金屬陳中翰玉璫龔孝廉百藥董其事垂成自

式赴官京師力不繼遂停越八年耆民曹廷俊廷秀兄弟
踵成之知府于琨有記嘉慶二十三年重修郡人湯成彥
記曰常郡東郭外古剎林立金碧輝映若其標舉塵外聲
藻震中取靜於紛喧造境於空曠冠以杰閣翼以飛亭馮
闕四顧澄碧千里浩浩乎廓廓乎如脫塵氛而御飈車餐
沆瀣而控六氣斯真飛仙匿奇之宇上真藏景之區明月
入戶如聞帝子之笙白雲在天時肅茅濛之駕據吾郡之
最勝者則元妙觀尙焉觀爲晉永嘉中毛中尉捨宅所建
梁大同間號寶莊巖唐景龍中改名龍興宋祥符元年改
名天慶元元貞元年始改今額世閱千禩興替屢經神虬

志餘

卷四

祠廟

五

盤壁枯蘚剔懷仁之詩飛霞建樓穹碑摹虞集之記緬徐
道明之偉節義氣干霄覩趙王孫之留題墨妙爍古咸瀆
毘陵志所謂層檐傑棟爲吳中道宮之冠者是也夫蓬萊
芝圃實上帝之元都五岳列真啟羣仙之秘訣蠅裳鶴駕
出沒無方玉簡金繩胚胎彌始固言詮之莫盡豈形象之
能參苟非心符寂滅神契窈冥擬元圃以疏基橫玉京以
建宇崑陽赤水仙客於焉往來紫府丹邱羽人之所棲託
採神奇於魏帝取範雙童徵秘籙於淮南時逢八老青輶
朱節龍虎相趨霞帔星冠羽儀在列金容肅穆仙衛儼而
無聲神館虛罔迴飈降而成響固不足以肅百靈崇齋醮

遂兆庶之駿奔隆諸天之胙蠻也豈可使之亭榭蕪沒藻
井苔淪也哉而觀中有紅梅閣者相傳爲紫陽張真人注
經之所及石杏林薛景賢諸真人上昇處也以彼洞矚元
機播宣道術玉華十笏名標八素之方黃庭萬言職隸九
元之吏宜其躡紫霞騰翠靄指蓬山而永鷺望元洲而駿
驅琴高跨鯉遨遊碧瀛之間茅君御龍翱翔赤霄之上固
已直凌元景永列真靈而斯地也辱降飈輪得傳瑤冊靈
虬或幸其降臨草木亦含其光氣此則王母旣集青鳥列
其宵筵呂仙重來黃鶴聞乎曉笛元輓可溯仙牒非遙况
毘陵郡城土地平行無層巖疊嶂之異乏登高選勝之區

志餘

卷四

廟廟

三

惟茲一樓高出雲表欄檻百折背梯十尋山翠含雨遠攬
慧峯龍尾之奇寶鐸鳴風近矚叢剝浮圖之峻川原交會
煙雲萬變拓吳岫於掌上總具區於目中桃花一片飛來
武陵之源梅林萬株圍成綠萼之影固闔郡名勝之所鍾
羽流鍊丹之奧域非特金堂迨籟有類玉臺之山修廊容
輿還如委宛之岫而已也年祀云遙丹雘久泐住持屠來
同徐體微章永益憫前修之莫嗣慨廟貌之將頽請之邑
紳大宏願海經始於嘉慶二十三年落成於道光七年凡
增紅梅閣玉皇殿雷祖殿又重建三清殿靈官殿及兩廊
樓屋數十楹牆垣數百丈偉矣哉擬二儀而構室法三山

而建亭霧映霞騫波詭雲駭土被黼黻木化蛟螭敢綺疏
而朱鳥晨窺闕元關而青媛夜守鑊虹霓於高棟蔭雲氣
於長楣豈非匠由神運機以冥呈上玉翼而捫星飛瑤盤
而蔽景故能銅欄百重上追井幹玉樓十二遙接神仙瓊
枝旦動同瑤山之帝壇法鼓宵鳴狀縣流之璇館也乎某
習聞寶誥夙仰元風竊謂虛無者道而拯患則大濟羣生
沖漠者神而覺世則有裨聖教敢徵竹素用勒穹珉摹桐
柏金庭之碣才謝休文撫天台仙館之文祠慚孝穆元
陸文圭天慶觀丹樓詩丹樓獨倚對青山山色依稀十二
畫曉氣淨連江樹碧秋雲低護石苔斑仙人長嘯聞天外

志餘

卷四

祠廟

古

羽士吹笙帶月間安得置身蕭爽地卷簾時待鶴飛還
明張以甯題元妙觀主程南溟所藏馮太守蓮花圖詩往
時毘陵二千石能作池荷世無匹揚州真館驚見之江水
江雲動高壁紫臺石出羣仙朝露洗搏桑曉霞赤翠蕤絳
節光陸離漢女湘妃失顏色就中一箇異姿格彤霞酒銷
雪色白道人一笑三千齡太華秋風語疇昔憶余濯足江
上游浩歌小海無人識荷葉荷花夢裏香倦游見畫三歎
息君當取此葉爲舟凌厲南溟觀八極暮年賀老乞身歸
分取鑑湖千頃碧

天甯萬壽禪寺

明羅洪先寓寺成可大兄弟同省詩兩生

來就傳適我臥精廬共器餐僧飯分燈讀父書思歸緣問
寢謀道豈懷居試論西河易離羣何所如 唐順之塵外
樓二首高閣春殘始一登忽忘去住似游僧齋鐘已罷鳥
初下江雨欲來雲白蒸笑指風旛看動息每從火宅試飛
騰年來漸解無生法翻訝前身可識曾金門十載笑重登
歸去仍依白社僧虛館靜聽宵蟻戰遠山時見夏雲蒸已
甘散櫟終年計耻逐冥鴻萬里騰爲問洛城游宦侶鬢毛
銷盡得閒曾

太平寺 宋蘇軾題太平寺法華院蒼蘄亭詩六花蒼蘄林
間佛九節菖蒲石上仙何似東坡鐵拄杖一時驚散野狐

志餘

卷四

祠廟

五

禪

定西鄉

永慶寺有宋孫覲修造記

端明寺本宋報恩感慈禪寺 宋蘇軾贈報恩長老詩碧玉
盃盛紅礪礪井花永養石菖蒲也知法供無窮盡試問禪
師得飽無又薦福老懷真巧便淨慈兩本更尖新馮師爲
作鐵門限準備人間清話人

案東坡題壁詩長老以紙餽之塗以堊迨後黨事起命
所在毀其文字人無知者遂得不毀禁弛寺僧始出之
而摹勒於石明時尙存

新塘鄉

大頂禪院在夾山唐咸通間建嗣改名慈雲 宋太平興國中仍賜今額乾道初比丘道元重修告成於淳熙庚子明正德元年住持圓明募建前殿萬曆四十二年僧廣明與里人曹士永唐正家唐詩謝譽曹桓等重建大殿暨西方境樓九楹邑紳錢春有記 國朝道光二年復建有碑舊志誤列太平鄉

迎春鄉

妙湛庵在小山下一名龍泉庵 宋慶元二年僧闍創建明洪武八年僧獨峯重修正統間僧譽成懷玉俱焚修於此

志餘

卷四

廟廟

夫

今廢 唐陸希聲詩妙理難觀寺甚深欲知無欲是無心
茅庵不異人間世河上真人自可尋 明聶大年詩無塵
林壑漲烟霞中有樓禪佛子家山色送青凝几席湖光搖
綠映窗紗雷轟老樹撐孤榦風度長松落細花有暇還來
借游憩地鑪燒筍漫煎茶 以上陽湖

志餘卷四之一

祠廟續補

子城廂二圖

節孝祠在西小河沿詳新志光緒三年建後享堂三間廂房一間共費六百數十緡郡紳沈保靖捐四百緡盛康捐一百緡汪彥傑捐五十緡

西右廂

太初菴在青果巷詳舊志兵後僅存頽屋數椽光緒十三年知武進縣金吳瀾倡捐建復留仙閣修葺殿宇改建大門二門繚後垣於閣旁增建僧寮廚房給示勒石報府立案

志餘

卷四

祠廟續補

一

孫公祠在忠佑廟西偏趙懷玉撰碑曰勝國之末我朝之初吾郡司土之吏耿人心目者厥惟二公爲最著一曰江陰典史閻公應元是能與大兵相抗率一城之民殉於忠義者也一曰武進知縣孫公是能保餘黎不反援一城之民免於刈戮者也二公者或活人或活人道雖迴殊而功實相埒閻公明史有傳又易名異代邀國家褒忠曠典已可無憾孫公則雖列名宦而羣沾犖漚專祀久虛未足以申酬報無論賢愚貴賤每及此未嘗不疚於中焉當公之攝武進也署知府宗灝貪很險鷲被其禍者踵接人情洶洶灝亦自危會豫王攻江陰暫駐常州因乘間請曰

常民亂萌已形不速屠且立叛王勒兵欲出公聞急入叩
頭流血願以一家明全城無貳志灝怒揮刃脅之左右鞭
笞雨下公無異辭賴舊守郭嘉穎都督馮可宗僉謂公言
是力請於王始得免而公已肢體傷殘血殷裾襖矣烏虜
向使公言不力吾之先人且不可問何論今日詩云民之
父母記曰能捍大患則祀之生我之德既竝二人廟食之
隆不宜百世哉康熙中先侍讀爲諸生與學校之士具呈
當事請入名宦其入祠之文實出先尚書手嘉慶丁卯戊
辰間懷玉與蔣通判麒昌洪編修亮吉輩屢倡建祠之議
欲以西廟隙地徐君祠址及城北廢庵爲之通判病中猶

志餘

卷四

祠廟續補

二

以爲言惜無後人繼志而議者旋散費亦不集說遂久寢
年來余以病廢不能兼及戶以外事邑人仍於忠佑廟西
偏葺屋三楹奉公神位於其中爲春秋祭饗之地雖規楹
籬備而俎豆聿新邑之人尚歔然抱慙將俟羣力稍充擇
地另舉亦足徵盛德難忘秉燹未泯故事雖緩而願卒償
也昔大學士劉公綸奉諱里居余每往謁輒譚桑梓軼事
一日言里有楊某嘗赴邗上爲狹邪之遊妓知楊籍常州
喟然曰吾先人亦曾官是土者賊而問之以宗姓對於是
知爲灝後嗟乎此之餘殃若此公之食報甯有窮乎衆以
懷玉先世有勞於公屬文以紀之方灝守吾郡郡人嘗爲

立石曰常郡守廣陵宗公保全百萬生靈闔郡頌禱之碑
蓋齋灑之威迫而貢諛非由衷之論也乾隆中石已磨去
不能遺臭今懷玉乃得表公於百七十五年之後事久論
定是非益彰此所以力疾握槩欣然任之而不敢以不文
辭也公諱振先字光裕泗州人

河南廂

蘇東坡先生祠見前 國朝邵長蘅登郡城西樓因謁祠詩
古戍寒花驛秋風燕子祠女牆銜落照官閣獨題詩水抱
孤城轉帆隨度鳥遲居人肅遺像過客讀殘碑俎豆還今
日衣冠自宋時荒階一長揖風雅足吾師

志餘

卷四

祠廟續補

三

河南廂

曹青巖祠在孤兒橋東祀五品銜守城殉難曹禾詳新志同
治間郡紳沈保靖助建俾祠裔守香火 謝應芝撰青巖
先生傳曰曹禾字青巖武進人業醫爲人長身面黔黑額
有風稜喜言兵亦間爲詩古文然未工也自常州聞寇警
卽聚鄉勇朝夕訓練黑衣跨刀督帥巡閱里八年無倦色
余嘗造其廬小僮引入室中方據案讀漢書蓋效隋之李
密而爲用各殊嗚呼可謂豪傑之士矣賊薄城下登陴巖
守禦城陷之前一日中礮死論曰余欲訪求里黨死節之
士傳聞異詞而曹禾素稔其爲奇士有毛曾蔭者亦業醫

賊入城索括至其家與賊辨論是非賊怒殺之合門罵賊
死老儒數人衣冠死明倫堂而姓氏無聞莊續澍玉鯨年
七十餘矣隸書學唐人而天文家言獨精於漢學謝勤澤
耘亦踰六十工畫喜奕技藝之微專而能精嗜古者恒以
傳名又皆與余久故然或自裁或遇害或并未嘗死且不
得其詳况一介之夫被虜不肯屈辱者其名滅沒無稱矣
悲夫

懷南廂

海烈婦祠詳前光緒十三年安徽巡撫陳夔龍倡捐增建自爲
記曰咸豐間外舅季文敏公方寓虞山余每渡江省外舅

志餘

卷四

祠廟續補

四

則必經常郡見所謂海烈婦祠者蓋臨大河爲屋五間中
爲門其左右四間爲墻墻上大書四字高大與墻埒一二
里外可見也而未知海烈婦何如人後十餘年官京師得
梓亭陸子集讀之乃知其生閩閩之中事貧弱之夫遭遇
強暴百折而不挫其節蓋士大夫所不易言者爲咨嗟久
之然是時江南北兵事甫定祠蓋蕩然矣又十餘年余官
開封而故人瞿畊甫觀察官於楚畊甫固常郡人也乃寓
書商其事畊甫不以余爲迂又以謀之同郡諸君子而以
鳩工之事託之其師莊俊甫先生越二年來書則祠已告
成而乞余爲之記於戲烈婦所全者僅一身之節而其事

亦遙遙二百年矣然吾觀望溪方氏之書東鄂氏撒克達氏李氏佟氏官爾佳氏嗟嘆不足至以爲

本朝之興王業之本受命之符於是乎在豈其無所見而云然耶記曰親親也尊尊也男女有別此其不可得與民變革者也天地有不可變革之理而受中定命因之有不可變革之節是所謂國於天地必有與立者觀於烈婦之事歷二百年而憬然不沒於人人之心亦可思其所由來矣祠之成凡用白金八百兩有奇凡輸金者皆勒名於碑陰以示後來云光緒十四年二月 以上武進

左廂

志餘

卷四

祠廟續補

五

三義閣在關廟內詳新舊志 國朝邵長蘅記曰生爲萬人敵沒而以靈爲神求之史冊往往而有若廟祀徧天下幾與素王之宮社稷句龍棄之壇壝埒自王公大人下迨傭販賸隸以至武夫悍卒殊域徼外之人莫不搏頰乞靈恐後其威神英爽有以奔走一世而不知其所以然互千五六百年間惟帝一人而已毗陵廟祀帝始於明嘉靖三十五年時倭寇蹂躪內地王師討之過常州軍中若見帝靈響師大捷於是督師者檄有司立廟於常具邑人唐中丞順之所爲廟碑按史帝初謚壯繆以侯禮葬宋大觀初加封武安王明萬曆間封伏魔大帝天啟間始詔中外凡祝

冊廟額皆以次秩帝號而碑猶稱侯仍其舊也先是廟當郡城巽隅巋然一突相傳湯信國將臺遺址顧前崇後庫形家言以爲不稱入 本朝故大學士呂公宮前殿撰楊公廷鑑各倡捐若干金構傑閣於殿後凡五楹址崇及僅閣崇三倍址廣可布十筵深不及廣三之一經始順治己亥十一月至庚子十二月訖工費白金一千二百兩有奇道紀陸序奎實董其役旣成竝祀漢昭烈張桓侯於閣而名曰三義州人歲時奔走祀事或疑昭烈桓侯身未嘗至吳又非有功德於吳民於祀典爲不經此拘儒之論也史稱先主與二人寢則同牀恩若兄弟而稠人廣坐侍立終日

志餘

卷四

祠廟續補

六

隨先主周旋不避艱險蓋當日異姓昆弟之好如是桓侯卽亡論帝從昭烈於崎嶇顛沛羈囚奔竄之餘不爲威怵不爲利疚間關百折而卒歸故主帝之心詎能一日忘昭烈哉今夫幽明一理也生而誓以肝膽死生之信北面而事之歿而漠然等之途人帝在天之神當亦有惄然不安者然則閣之建所以益妥帝靈而爲吳民邀福於帝甚鉅閣成二十年序奎之徒曰褚真一始乞余文記閣成月日與其師之姓名余嘉真一能不忘其師之成勞而又以慨呂楊二公能捐數百金爲人士倡而獨未暇礪片石以垂後良爲闕典遂不辭而碑之且爲詩三章以享神其詞曰

童童車蓋樓桑村玉璽騰漢火井然大耳公是隆準孫武
擔山南踐至尊千五百年靈爽存重檐畫棟高截雲神來
格思羽葆駢赤螭驂駕雲旃翻春蘭秋桂永弗諼修筵廣
室神孔安右享昭烈帝功赫濯神在天上爲日星下嶽川鬼工
七日創玉泉赤驥躡鹽池寒豐碑穹祠窮遐垠孰如茲
閣傑且安巽隅嶙峋古將壇赤鈴絳節紛麾旛俎豆一堂
弟與昆千秋萬禩福吳民右享帝君燕領虎類猶如龍起噓炎
燼扶桑紅橫矛橫目長阪東闕如墟虎氣薄虹猱兔愕胎
避厥鋒釋顏走郤惟侯功生萬人敵歿猶雄幽明一體胖
蠻同有閤截業神所宮出入肅肅飄回風右享桓侯

志餘

卷四

廟廟續補

七

中右廂

忠義祠見前

附趙翼陔餘叢攷常州有忠義祠祀宋末守城死事諸臣
是時元兵至常郡守趙與鑿先遁郡人錢嘗以城降劉師
勇復之朝議以姚嘗知常州事王安節率兵守之自夏及
冬拒守數月伯顏驅城外居民運土填塹土至併人築之
城破官民盡殺無遺類得免者僅七人事見續資治通鑑常州屠

戮之慘自開闢以來未有也伯顏因常州拒守至平江疑有備乃不煩兵而下因笑曰

常州紙城鐵人祠中神位首文天祥時爲安撫大使知平

江遣兵來救者也次姚嘗次王安節一文臣一武臣皆城

主也次陳炤郡人爲通判助守者也次師勇先復常州後城陷遁去卒死於閩中者也次判官郡人胡應炎次知武進縣包圭皆城破身死者也次巡檢尹玉麻士龍卽信國遣來援士龍戰死虞橋玉戰死五牧者也次知無錫縣阮應得鄭所南集作阮正巳其子亦從父投水死常州破後兵至無錫亦殉節者也次僧人萬安道士徐道明巡檢方允武溧陽尉莫謙之皆同守常州同死節者也而元末守土死事之武進縣令劉溶亦耐焉從其類也今以宋元二史考之尙有遺漏者陳炤傳錢嘗以城降後有淮民王通居常州陰以書約師勇爲內應師勇遂復常州則王通宜增祀也伯顏傳常州

志餘

卷四

祠廟續補

八

守判旣降師勇與張彥王安節復之彥尋被執於呂城不能完節固難從祀而安節傳常州旣復命安節與張詹共守則張詹宜增祀也尹玉傳謂師勇復常州後卽赴平江而張世傑傳則云師勇守常州城陷拔柵出走其弟馬墮墜躍不能出師勇舉手與訣而去惜其弟名不傳此亦宜增祀者也宋史又謂莫謙之宜與僧人起義兵歿於戰贈武功大夫則謙之官號所謂溧陽尉者宜改書也元史劉良傳良爲常州萬戶府知事張士誠來攻城陷良赴水死武進縣尹劉溶戰於葛仙橋亦死是與溶同戰死者尙有劉良今溶旣附祀則良亦宜增祀也

近日忠義祠內增入劉忠毅熙祚馬文肅世奇王節愍章
金忠潔鉉皆明末死國難者劉巡按湖南死於永州馬王
金官京師死甲申之變以之祔祀固宜然實有不必者此
祠之建本因宋末常州守士諸臣以身殉城故血食於此
而祠創於前明故并元末守常州死事之武進令劉溶亦
附焉凡以祀守常州殉節之人非祀常州人之殉節於外
者也若并祀常州人之殉節於外者則又不止此四公卽
以明季而論宜興盧忠烈公象昇戰死於鉅鹿南都亡後
其弟中書象觀赴水死從弟象同拒戰死又有王行儉崇
禎十年進士守重慶府張獻忠之難被擄而死吳炳爲永

志餘

卷四

祠廟續補

九

明王大學士兵敗自縊於湘山寺莫可及爲長沙照磨攝
甯鄉縣事流賊破城力戰死子若鼎若鈺亦遇害史夏隆

爲南昌推官集兵守城城破殉難

皆宜興人

無錫堵允錫仕永

明王死於潯州王孫蘭爲韶州副使流賊將至城中人盡

逃乃自縊死龔廷祥宏光中爲中書舍人城破步至武定

橋赴水死

皆無錫人

而江陰舉人夏維新武舉黃略諸生許用

明史侯峒曾傳內作許用縣志作許用德

王華呂九韶以守城死貢生黃毓祺

出亡後仍抗節死閻應元傳內江陰死事之人更多見明

史第二百七十六卷此皆常郡人也劉馬四公旣祀則此

十數公者不當增祀乎若謂劉馬四公死流賊之難其餘

則多抗 本朝故不得與然 本朝修史已備書之或專
傳或附傳皆不沒其實則亦何不可增祀乎况莫可及王
孫蘭等亦皆死流賊之難者乎若謂盧堵數公皆常之屬
縣人故不祀於郡 堵允錫明史作無錫人 邵青門集作宜興人 然四公內馬文
肅亦無錫人非郡城中武進人也何取此舍彼乎况武進
人尙有薛聞禮薛應玠聞禮爲黃陂典史流賊所設僞官
至爲士民殺死聞禮令士民盡逃獨以身當之爲張獻忠
所殺應玠攝龍州事李自成來攻城破罵賊死又吳鍾巒
魯王監國時爲禮部尙書兵敗入昌國衛抱孔子木主自
焚死鍾巒之子名福之亦舉兵太湖中據長白蕩爲 大

志餘

卷四

祠廟續補

十

清兵所執殺於江甯又何以不祀乎且劉忠毅之弟永祚
守興化城被仰藥死親兄弟也祀其一而遺其一可乎此
當日增祀時不及詳考遂致掛一漏百本欲表揚常州之
忠節而適以形常州忠節之少也愚謂常州忠義祠內本
不必增此四公福王時南都建旌忠祠馬王金三公已在
正祀之列我

世祖章皇帝又命所在給田七十畝建祠致祭

俱見明史

則馬王

金三公本有專祠永州當亦有劉忠毅祠若本郡則宜人
鄉賢而不必混于守常州死事諸臣之內旣欲增祀此四
人矣則當于祠內隙地另建一堂彙祀常州人之殉節於

外者而盧堵諸公並列祀焉庶不致貽笑於考據之疎也
以上武進

中右廂

趙氏忠節祠在古村祀 國朝教諭贈道銜趙起祔從死諸
人起孫壽仁集捐卽約園故址建知武進縣金吳瀾詩曰
漫道書生弱成仁竟殺身四郊竄豺虎滿目逼烟塵孰是
登壇將誰爲守土人先生獨慷慨大節凜君臣養士朝廷
重忠貞萃一門寒烟羸義骨清水葬詩魂萬古綱常振干
秋俎豆尊我來一憑弔浩氣滿乾坤

東直廂

志餘

卷四

祠廟續補

七

延陵季子祠詳舊志 元薩都刺延陵曲延陵廟西落日低
延陵廟前春草齊千金公子去不返淡雲古竹斑鳩呢
明謝應芳兵後過祠詩延陵采地荒榛棘延陵遺廟成瓦
礫延陵野老歸弔古獨立斜陽長太息塵埃野馬紛滿眼
城郭人民總非昔共惟秦伯吳鼻祖三讓高風冠千古周
襄列國俱戰爭卓爾雲仍踵遐武去國躬耕江上田曰附
子臧非浪語天倫義重情所鍾屹立狂瀾見孤柱此義孰
可比采薇西山孤竹子此情知者誰獲麟老子十字碑德
音寥寥二千載陵谷幾番經變改江南近代淫祠多梁公
不作可奈何於乎祠堂之毀還可屋禮讓風衰較難復漢

家兄弟歌布粟唐家兄弟相屠戮何當大化一轉轂於變
澆滴作醜俗九州八荒春穆穆泰伯延陵斷弦續芳也未
死當刮目

圓妙觀見前 元薩都刺題玉皇閣虛空臺殿枕層岑木杪
丹梯起百尋花落鳥啼青竹裏客來犬吠白雲深松壇盡
日移幢影石室天風送鐸音老鶴如人窗下立閒聽羽士
理瑤琴

天甯寺 明薛應旂唐荆川攜觴邀遊天甯寺次韻四首塵
外樓臺次第登不勞清供費山僧霜前朱柿逢秋滴水上
青蘋向午蒸客倦欲依林石卧心閒猶厭野雲騰治安豈

志餘

卷四

荆廟續補

七

是長沙傅譴謫於今媿亦曾十年朝市逐人登今日相看
白塔僧石鼎香消紅火活竹鑪茶沸翠雲蒸雨花滿座蒲
團靜過羽飛空錫杖騰可笑黃梁炊未熟不知塵夢醒來
曾世路年來覺嬾登叩關終日訪高僧晡時宿霧將收斂
冬月恒陽尙鬱蒸因謝紛華能妙悟不緣降伏制奔騰利
名海闊多沈溺末路回頭又幾曾香臺拉伴喜同登自信
吾儕有髮身羅薛任穿安用補燕菁生喫不須蒸忙中常
覺心苗淨夢裏原無意馬騰盡說機關應解脫直從參透
有誰會 國朝胡香昊看東郭楊家晚菊就飲毗耶室秋
樹寒雲色漸黃野人門徑似山莊融融冶冶延佳客葉葉

花花媚小堂
衡宇偶逢僧
飯熟布帘吹
過酒杯香亦
知繡佛憐蘇晉
別有真空答
上方陸璽天
甯寺絕糧僧
散詩糧盡持
空鉢年災散
衆僧風來翻
貝葉月去暗
禪燈爐靄思
雲繞寺自崇香
雲繞扁額莓
落歎雨增飯
依摩頂處佛
法杳無憑許
概天甯寺贈
拙庵上人恒
贊詩城東古
招提象教久
表榻巋然聳
塵闈紅日到
檐闕佛頂怖
鴿巢講堂馴
龍謁布僧念
吽供接衆擔
夸歇上人今
惠休有報無
曲折妙觀得
摩佗性命耽
禪悅已公詩
句新智永書
法絕不覺蘭
奢譽誤墮慨
狂譎吾道涵
天地萬象朗
一月異端竊
餘光爍火自
明滅毒發二
千載流禍今
更烈補國無
絲毫聚食耗

志餘

卷四

祠廟續補

三

民血往往不
逞徒盜據作
窟穴逃徒使
愚頑兼足惑
明哲遂令二
氏橫岌岌人
道裂上人本
儒冠吾甚惜
風骨曷不返
門牆卓爲衛
道傑胡爲外
實口語錄競
空滑執麈試
參禪三幡久
了徹留詩贈
文暢聊當衣
袂別陸爾熙
日暮懷天甯
禪院定公上
人定公有真
趣神味與天
遊時作拈花
笑能令雅意
投禪房清似
水人語淡於
秋儒服滋慚
愧臨風動暮
愁

大甯鄉

義烈祠在高山祀明死義顧湯卿南戶科給事中徐常吉祠
詔曰顧君之祀高山里也蓋爲死盜云歲戊子大履寇盜

橫起里豪右什九徙郭邑不卽廬戒戶守老幼矛戟警報
日上郡縣郡縣下部卒捕獲則縮首弗敢前第詭報盜亡
去會他警又上檄諸巡司兵勦之亦竟游戈飽餉詭報如
捕卒用是盜勢益張鋒燹金鼓所在四起徹夜不得就枕
父老相視而噫君怒曰盜縱若此而恃官兵官兵畏懦此
無異倚羊拒狼今決策無若鄉團練練兵於鄉人思自衛
志意不貳便一地里素熟可以據險設伏便二晝戰目相
識夜戰聲相聞便三以飽待飢以逸待勞便四投以部伍
呼吸進退遠近應援便五若能從乃公當爲若將么麼不
足殲矣皆曰諾於是置牛酒會衆申皇祖大訓簡卒厲器

志餘

卷四

兩廟續補

四

勒以軍律其法擇曠地爲團團十隊隊二十五人而有長
分布要害約曰吾地盜出沒喉也且盜狂而驕謂吾猶向
者官兵耳須一大創之故兵法伏後起今乃先起偪使與
吾遇於是盜果驚欲走歸正遇君陣君奮矛刺殺其驕者
衆乘之羣盜遂潰會後夜復寇橫溝等鎮君分兵趨之顧
見有餘盜在後君還擊錯足陟水賊爭飛刃投君君嫚罵
而創以死衆聞急轉掇無及矣方是時號躅震山谷卒以
君遺法滅盜而報仇焉事聞郡邑郡邑旣爲設祠錫冠帶
以義烈顏君復檄他處用其法并蕩餘寇時郡邑嘗事者
祝公眉壽梁公鶴鳴也祠旣成子世登入祀田二十畝守

世祀而走請不佞爲之記不佞慷慨太息曰嗟乎義士竟其才使得專方面卽方叔召虎曷以加諸不然當國家多事而令帥偏師以修封疆亦縵胡之良選也詩云糾糾武夫公侯干城君之謂矣先是里有舜河數十里灌漑是賴而積淤當濬任事者少君倡而請當道且身爲董役不兩月報竣里東有吳涇亦要流而久涇者也君又疏之辛巳例丈田君奉上官檄履畝規畫均科無所私其他義舉固指不勝屈竟死保障惜哉然以保障死猶不死也媿未卽疏君而識其概如此君諱湯卿字正臣 後竝祀湯卿祖故孝子文英改名二義祠

志餘

卷四

祠廟續補

五

豐東鄉

周文襄公祠在三十三都三圖以文襄巡撫江南築芙蓉圩隄成田十萬八千餘畝民享其利祀以報德明宣德間建國朝道光辛丑圩人姚信李毓華重建咸豐間燬於寇同治二年重建有稱字號田十一畝有奇以供香火 按李志誤列豐北

政感鄉

薛和國公祠在五牧明裔孫薛應旂建其祠堂碑略曰初公在甯宗朝以父任補官目擊時事夙有去志丐祠不允既以樓宣獻公鑰薦復舉制科循歷通顯當是時日食迭見

大火頻仍朝臣鮮有言者公獨疏請深思顧諟之難益懷
兢業之念勿謂帝德罔愆而怠於進修勿以天災代有而
應不以實若今日避殿損膳非所以消沴而召和也上爲
斂容其諸更楮備邊補偏救弊更僕難數豈隱忍附麗以
希富貴者哉樓公固趙公汝愚立朝少所許可其所留惟
晦菴所薦惟公可以諒公之素矣公初居瀟湖之黃土岸
旣而置別業於橫林之後埒命子守之後立公祠肖象於
中嘉靖間應旂待次家居因疏河得石刻蓋公嘗築觀文
橋於茲積久圯壞旂感異之遂特建公祠云

保甯寺一名接待庵在橫林鎮北 元趙孟堙傾蓋亭在寺

志餘

卷四

祠廟續補

六

詳舊志明謝應芳賀潤天澤住持詩橫林之北橫山西孤
村流水古招提青苔一徑童不埽白雲半間人共棲松枝
甘露落塵尾桂子香風吹麝臍我來欲問生公石道價孰
與生公齊

安尙鄉

麻尹二忠祠見前 明薛提學應旂創建記曰夫人竝生於
天地間渙然無統也而卒爲君臣上下尊卑貴賤以相服
習雖常變順逆安危緩急生死利害交於前亦若一定而
不可易者人孰不謂勢爲之也然勢可爲之於若而其持
之於微則實有屹不可拔者存而宰制化原鼓舞羣動乃

勢之所自出而輕重由之勢固無庸力焉而莫知爲之者也此豈可以他求哉求之固有之人心而已矣中心爲忠此固人心之固有者也然或怵於利害迷於取舍一旦喪其所固有而遺親後君從茲始矣然則人心之關於世道也顧不大哉是故睢陽之廟見者與嗟朱仙之祠聞者思奮是後人之崇祀先烈不惟追獎忠魂而實以激發生人之固有爲扶掖世道之一大機括也惟茲五木爲東南孔道當宋德祐初丞相文山文公因元人圍常州遣諸將將兵挾援道多遁去唯尹公玉麻公士龍分哨進兵麻公戰於虞橋死之是時援絕力竭尹公猶收殘卒五百與元兵

志餘

卷四

祠廟續補

七

戰茲五木相持一夕手殺數十人被執不屈元人橫四槍於其項死之夫虞橋去五木不數里而成仁取義如二公者乃皆捐軀於此且餘兵激於二公之死夜猶揮戈突戰流血枕骸橫蔽原野無降者於是闔郡士民城破巷禦甯就屠戮而不忍甘爲臣僕是茲五木固二公死所爲倡率忠義之地不啻若張岳之睢陽朱仙也三百年來祀典未舉行道傷之矧吾土著之人能不拊心而負媿乎憶余少游郡校通守吉水王公昂署郡嘗以策諸生且謂五百死士無歸而是方屢遭水旱豈亦噫噓湮鬱之氣上薄陰陽之和歟余對激切公曰此吾黨之責也議將建祠祀之若

於經費而公亦適值內遷遂中止之爾來又三十年矣余叨祿仕不敢負厥初心茲自浙歸檢括俸貲經紀祠事相攸筮吉得地於五木鎮西觀文橋之左聚材鳩工躬自督率始於嘉靖癸丑之三月至冬十月落成凡爲前堂五楹中肖二公之象東西廡各三楹春秋有事則合五百死士而耐食其下後爲燕寢五楹神厨二楹遮西以北仍築室三間施僧守之鑿池繚垣啟門南向隱隱與虞橋相望題曰二忠祠云余惟正氣之流行於兩間也在天爲日星在地爲河嶽在人爲忠義二公與五百死士之忠魂固無所不之也豈必廟貌於委身之地而後爲得所歸哉實以人

志餘

卷四

廟廟續補

六

心易失而難全世道易流而難挽而嚮赴之幾間不容髮蓋其初若無所重輕而積習以成則懸若霄壤是故有植遺腹朝委裘而天下不亂者有朝秦暮楚視去其國如視傳舍者人同此心何若是之頓殊哉此古昔先王所以樹風聲表宅里以慎其感也慎其感則中人以下皆知所趨而人心斯有足恃不然則大敵在前甘心竄匿若彼張全朱華者獨非人也與哉獨非人臣也與哉鄙夫昧心視軀爲重偷生一時竟亦腐滅其視二公之一死以全人心以盡臣節偉然爲烈丈夫而千百世之下凜凜猶生者相去何如邪雖至愚者當自有辨而頑懦者亦將勃然而興矣

以一髮而引千鈞此固余迂愚之見而立祠之意也因勒碑以記之割田二十畝充享祀修理之費其具列碑陰

昇西鄉

卞忠貞公祠在昇西祀晉尙書令贈驃騎將軍開府儀同三司壺宋都統制兼兵部尙書忠勇公長卿祔 國朝乾隆間知縣李衛祠碑曰

皇上御極之十有一年德教誕敷百廢具舉 詔歷代名臣有功德燁赫應祀典而祠宇圯毀不完者令所在郡邑以時報聞給帑金遣官監視修葺由是江蘇撫憲奉部檄行查陽邑則晉成陽公尙書令贈驃騎將軍開府儀同三司卞忠貞公名在列前令得檄卽走隸召其裔孫祠生穎并庠生岳禮思太學生枋禕等詣縣問狀至則諭以 朝廷德意咸感泣列跪庭下具言其先人荷蒙

皇上垂恩存卹榮施子孫永永戴德敢復以草莽安靈之宮

重糜 國帑况今榱桷粗完足蔽風日懇爲申憲辭免而

又念公祠非及時整葺無以圖久遠乃鳩族人貲庀材而新之越二歲乙卯訖功值余承乏茲邑復來告且曰族多窶人困於貲規制未備丹堊未華也願有述以示後余案晉書本傳公諱壺字望之初事元帝爲從事中郎明帝時爲尙書令受顧命輔幼主立朝侃侃不阿權貴雖勳如王

志餘

卷四

祠廟續補

九

茂宏戚如庾元規裁斷無所回屈舉朝憚之成帝委心倚任焉至元規欲召蘇峻公力諍不納又與平南將軍溫太真書悔其遣出外鎮言甚切至豫知王旅不足捍賊而決計殉國父子同死忠孝一門其大節爲東晉一人宜其浩氣長存天壤所在廟食尸祝爲典午功宗無愧也顧公廟肇建於金陵其在晉陵則以公後人名長卿者當宋高宗建炎初扈蹕南渡道卒於常上追念震悼賜葬永勝西鄉謚忠勇子孫依葬地以居世祀忠勇攷詩人厥初生民之義因追建忠貞公祠舊載郡邑志歷代崇祀無闕又按卞氏家乘有高宗敕祀成陽忠貞公賜兵部尙書長卿詔長

志餘

卷四

祠廟續補

三

卿上表陳謝則是高宗之意固以忠勇公克篤前烈爲成陽象賢之耳孫故命之世守忠貞之祀爰及苗裔罔替厥初固非若子孫自爲推崇而溯厥遠祖者比也而忠貞在天之靈亦將依遲眷顧陟降其庭而式馮焉視他州縣之爲公後而建祠以奉公者孰輕孰重固不待智者辨之矣余吏是邦暇日登雉樓俯南郭於斷烟荒草間遙指而想見之曰此忠勇之墓此忠貞之祠也雖不能至心嚮往者久之倘請一辭而不之答是負余素心也於是進卞氏諸生而告之曰而毋以祠之隘且樸爲惡也使德不足以饗則雖渠夏崇墉丹楹畫棟過而睨之者恐其退有後言也

若公所樹立起懦頑廉震爍聳警吾知過公之祠者徘徊
叩止而遙矚焉將見正氣充牣肅然熏蒿憐乎愜乎精爽
如在宮若增而闢采若增而煥庭卉交柯若增而馨望舒
弄影若增而皎竦而植者喬木若增而高環而流者清池
若增而濬而

當陽之聖人方且爲之發 德音下 明詔 綸絲炳爛終

古照臨室雖隘爽塏也材雖樸輪奐也而又何慝焉諸生
咸起再拜曰敬受命願世世頌

聖天子履疇之德弗諉也因隱括公生平并次其言鏤諸石
載爲辭歌之曰在晉之東天步方否王室新造峻繼敦起

志餘

卷四

祠廟續補

三

公爲統帥禦賊大桁甘蹈凶刃父子殞生歷千餘年秩以
祀興於勝之西籩豆有踐維

皇建極下 詔褒忠式訓來者視此祠宮

乾隆三十年九月
陽湖縣知縣汪牌

諭奉祀生卞忠簡於府學額征租銀內從乾隆三十一年
春祭爲始每祭給銀一兩九分四釐六毫七絲三忽二祭
共銀二兩一錢八分九釐三毫四絲六忽撥給專祠致祭
等情奉閣撫部堂莊批如詳飭遵督學部院梁批據詳已
悉各等因到縣奉此合行飭知爲此仰該奉祀生卞忠簡
遵照每祭赴府學具領祭銀備辦聽候致祭毋違等因光
緒十二年祠裔呈驗牌諭稟經
轉詳藩憲批准照例給領在案

定西鄉

端明寺 元馮子振遊報恩寺讀東坡石刻詩老石經劫壞
神物在處留元豐蘇長公有倡當須酬莫作分別想滄海

粟影浮同生宇宙間何許更九州文字千古映醉墨楷法
道願香五百年華屋真山邨且從蘇子訓銅狄三千秋

新塘鄉

蓼莪菴 明徐問詩二首幽人振高步引入老僧家寺卧千
年石天浮八月槎寒雲封寶竹宿霧濕曇花惠遠俱塵跡
空山日又斜望渺招提寺登臨震澤通一徑鳥啼寂萬山
松落空湖光上高閣竹影亂疎風握手襟期遠無勞卜讓
東 國朝邵長蘅蓼莪禪寺新建大悲閣記蓼莪禪寺舊
名蓼莪菴相傳菴以晉孝子王裒得名訛也又傳菴左荒
冢爲王裒墓邇年或立碑其上尤誕妄按史裒字偉元祖

志餘

卷四

祠廟續補

三

修父儀家世北海營陵人晉文王爲安東儀爲司馬東關
之敗文王問近日事誰任其咎儀曰責在元帥文王怒遽
殺儀哀痛父非命絕世不仕立屋墓側旦夕至墓前拜輒
悲啼欲絕墓前一柏常所攀援涕泣所著色與凡樹異讀
書至哀哀父母生我劬勞未嘗不三復流涕門人爲廢蓼
莪又按王隱晉書王裒亦作裒當洛都傾覆寇賊蠶起裒
宗親悉欲移江東裒戀墳墓不肯去賊害之裒事見正史
者如此夫裒以孝稱當其生存不肯離墳墓一宿於外遭
亂猶戀戀首邱甯以身殉裒旣死安得踰淮涉江跋涉二
千餘里而營葬於此此事理所必無者間嘗覽武進志載

新塘鄉有嶺曰黃婆嶺俗亦呼王褒嶺蓋音近而訛云或
者因嶺而及菴因菴而及墓俗儒不說學往往傳會古蹟
疑誤後人如此類者何可勝道哉余又心疑蓼莪名菴其
來頗久明杭雙溪淮家半江珪皆有遊宿蓼莪菴詩二公
皆成宏間人有文名詩無一語及喪事今年八月予監壘
藤杖信宿山中徧詢老衲欲求成宏以前殘碑斷碣無一
存者乃慨然以謂古人之傳疑者事必考之史理必證諸
經槩墓旣徵史而譌矣蓼莪之詩則經也嘗誦詩序蓼莪
刺幽王也民人勞苦孝子不得終養追而爲恨又深哀之
一則曰哀哀父母再則曰哀哀父母語極深痛校陟岵鵠

志餘

卷四

廟廟續補

三

羽諸詩其感人尤切然則昔人名菴之意蓋教孝也夫孝
道至大通神明貫儒釋聖賢以此教人慈氏亦以此度世
後之遊是菴者顧名而釋詩而測然念顧復之深恩動銜
恤之隱痛則是菴之神益於世道人心甚鉅而世俗顧斷
斷然欲牽附以王槩廢詩事其說非也菴勦建不詳所始
其廢而復興在 國朝順治間開山僧曰瑞雲自龍池來
把茆蓋頭斲石杷土者幾三十年而恒一繼之康熙己酉
立石紀月日乃額曰蓼莪禪寺近益構傑閣五楹供大悲
觀世音像閣成而寺益勝面湖環山凭閣而古桂蚪松若
蓋而蔥鬱會予至山中寺僧述其師遺命請予記甚力旣

念寺距余家五十里而近事有當辨謬正譌者亦吾輩責也乃不辭而記之開鳩工以戊寅十一月訖工以癸未三月必欲得予記者僧道林也以佐其成者某某得附書許棫詩一曲收湖勢春風喜客過樓爭修竹出佛占好山多花重低抄燕溪晴淺浴鵝最憐橫暮靄樵唱答漁歌

以上

陽湖

志餘

卷四

祠廟續補

十四

志餘卷四之二

塋墓

周

徐君墓在今陽湖丁堰詳舊志宋鄒忠公潛記曰案先賢徐君與延陵吳季子筆之史者著矣存而國家嗣立雅道胥匡殤而生死交情寤思彌篤而君既往而劍若長留此皆千古不泯之人心爲之也延陵之北地去七十里曰申浦有吳季子墓孔碑十字掩映古今延陵之東地懸十里曰丁堰亦有徐君墓墓前有祠祠前有井井前有亭亭曰劍井亭其後人志所思歟而叔立之世系於今未獲悉考矣

志餘

卷四

塋墓

一

今邈然弔古詢乃耆英究諸典冊茲一抔之土是其始墓不得不爲之記載貽厥後嗣永昭世守縱計之地廣有三百七十步四尺橫計之有三百五十步合計之三畝有奇隧路山川儼與申浦季墓聖碑兩相峙立豈非天之不泯其績而爲之長存者哉又不特人心千古昭然也抑徐君賜履彭城乃徐州兆域堂皇松楸鬱藹而淮之泗州堯之張秋更復巍然華衣象冢開阡詎徐氏之子孫繁衍各宗所自而追崇之或者古帝王仙聖委席留衣爪甲髮毛封墳掩石不可得而詳也故爲之銘銘曰靈劍尙存榮珪不掩拱樹孤墓天長地險帷堂野設帳殿郊祠土成黼黻木

影龍螭載拜與思如徐如泗血食方來碑陰永字

晉

曹將軍橫墓在橫山沖虛觀後詳舊志咸淳毘陵志云南唐徐錯碑云舊芳茂晉時常有紫氣右將軍曹橫葬此易今名三茅山人張存有當時不葬曹橫墓千古猶存芳茂山之句胡文恭宿詩云此地橫青嶂當年動紫氛將軍精爽在可解勒遺文

唐

太守陳庚首墓在今陽湖新塘鄉按陳氏譜太守卒於官葬陳灣山子孫遂家於常今下浦陳氏其裔也舊志職官

志餘

卷四

墓

二

表敬宗朝刺史有陳某佚其名殆卽是歟同治間付岷於西灣掘得斷碣云卒於太和二年某月日葬青城鄉疑卽此

宋

郡守李餘慶墓在橫山詳舊志沈括筆談謂公疆政疾惡墓土可以療瘧

鄒忠公浩墓在武進德澤鄉林莊詳舊志

附元王逢題鄒旅雲青山老隱圖并引青山老隱圖者予友鄒君時昌追慕其先道鄉先生而作也先生有墓有祠在毘陵青山門外中書左丞呂公思誠爲浙憲時嘗展拜

祠下命有司禁樵采後毘陵失守時昌時避地海上欲歸
省不可得乃繪是圖復自號曰青山老隱以示不忘首邱
之義予敬題以詩青山郭外道鄉祠宰木溪毛幾歲時繡
史罷伸芻牧禁畫圖深寓釣遊思疏星皓月飛烏鵲細雨
東風過子規更有張翰首邱賦倩予盥露寫烏絲

學士許叔微墓在陽湖迎春鄉勝子嶺

羅文恭點墓在武進孝西鄉羅墅西灣

尚書胥鼎墓在武進惠化鄉二十四都一圖

古忠義冢在陽湖孝仁鄉周巷西北宋德祐乙亥毘陵被兵
白骨盈野元至元辛巳判官鄭雲翼蠲奉收瘞骨以萬計

志餘

卷四 學墓

三

成大家有龔繡記趙文敏孟頫書

金國

不花丞相墓在陽湖政成鄉保甯寺北 案宋高宗建炎四
年春兀朮南侵不花從爲副帥入常州以疾卒葬此遂名

不花墩

西蓋趙氏族譜

明

陳知府寶衣冠墓在今陽湖通吳門外詳舊志無錫邵文莊
寶遺愛邱記曰此吾郡守陳侯遺愛之邱也邱之所藏者
何侯冠與衣也侯卒而其子某以其喪遺南海而葬焉民
見其行也不忍請其冠與衣而爲邱以藏之封之如墓謂

其精神之所存也過者輒瞻拜焉徘徊咨嗟久之而後能去歲時或裂楮澆酒焉如鄉人俗烏乎侯何以得此於吾民哉子產之語子太叔曰有德者能以寬服民其侯之謂乎吾又聞子產極論寬猛譬之水火而終之曰寬難非寬之難也有德之難也侯天性仁厚而加之涵養比舉進士以疾在告居山林者日長其德之所成素矣故其臨民亦如其平居也不自知其爲寬也而民之所蒙者如和風甘雨淪浹霑濡相忘而不自知寬乎寬乎在人爲難在侯爲易民之服之至與爲邱以志不忘上視召南之甘棠次若峴山之碑殆無媿焉峴山之碑見者墮淚召南之甘棠相

志餘

卷四

學墓

四

戒勿伐公之斯邱民墮淚而爲之者也其有樹焉猶待戒而後勿伐乎昔仲尼聞子產卒出涕曰古之遺愛也侯之初喪吾以病足不能往弔爲位於山中草堂而哭焉稱仲尼之言而三歎之巡按御史朱士完上其事於朝亦云爲乎侯雖亡可以慰於九原矣廣平申公繼公爲郡見斯邱也與其寮佐冷侯柴侯王侯劉侯謂不可無記而以屬於寶昔者寶視學至南安南安之民之思張東海也亦猶吾民之恩陳侯也有祠在郡中越數十年繼守者有忘心焉乃以其象徙置城北僧寺予問之則曰此侯之所樂遊也於是乎徙而奉之耳予至其處見其爲狀置而非奉遂命

返諸其故田是觀之吾申侯與寮佐諸君子視東海之後
政其爲心何如也吾於是重有感焉復稱仲尼之言三歎
而書之侯諱實字秀卿別號虛菴瓊山人也其政與行在
予誌今刻諸碑陰

知縣楊溢墓在今陽湖昇西鄉前黃原塘無錫邵文莊寶有
誌銘

信武將軍俞德成仁武將軍俞德威墓在今陽湖豐東鄉路
成松沿橋

僉都御史唐襄文順之墓在武進懷南鄉城渡山莊東

卽陶園

詳舊志元孫舉人字昭祔 國朝道光間里人李慶來重

志餘

卷四

墓

五

書立墓碑

尙書錢春墓在陽湖定西鄉浪港橋

巡撫許鼎臣墓在陽湖豐西鄉青龍橋子侍御之漸祔

劉孝子士悌墓在陽湖政成鄉二十四都四圍

朝議陸寶學墓在陽湖延政鄉雀干下 國朝八世孫舉人

徽恩九世孫知縣鼎敷祔

孝子楊乙墓在陽湖安尙鄉虞橋

孝子宋有稷墓在陽湖新塘鄉下浦 國朝光緒十二年里

人修築之諸生陸淵重立墓碑

修撰楊廷鑑墓在陽湖豐西鄉白茅塘橋

隱士邱稱公墓在陽湖迎春鄉小墅

布政贈太僕卿吳暘墓在陽湖迎春鄉耿灣

國朝

通判陸遇霖墓在陽湖定西鄉楊泗橋

兵備陸瑗墓在陽湖新塘鄉陳灣山鱖魚背子知府香森附

知縣陸繼輅墓在陽湖豐西鄉橫塘橋

編修張惠言墓在武進循理鄉塘北橋

御史管世銘墓在陽湖新塘鄉陳灣山子知縣繩萊附

知縣李光洛墓在觀山鎮花家坳屬江陰

布政贈太僕卿汪本銓墓在陽湖定西鄉余家村

志餘

卷四

學墓

六

同知陸藻墓在陽湖定東鄉馬杭橋

兵備張耀孫墓在陽湖定西鄉三橋頭徐家村

知府楊孝子傳第墓在陽湖豐西鄉後漢

布政莊受祺墓在陽湖定西鄉三寶橋

同知汪昉墓在陽湖定西鄉

兵備呂儁孫墓在陽湖豐西鄉倉頭橋

兵備史致諤墓在陽湖定西鄉龍游河

兵備陸傳應墓在武進棲鸞鄉村前

兵備吳鎬墓在陽湖豐東鄉河泊朵

兵備劉達善墓在武進懷北鄉李家村

兵備唐沛霖墓在陽湖豐西鄉黃塘里

朝議吳容光墓在武進德澤鄉花瓣琪

同知湯成烈墓在陽湖豐東鄉鴨楞塘

知縣史致準墓在陽湖豐西鄉王湘洛塘

編修陸爾熙墓在武進懷南鄉北張村

莊孝子世臣墓在陽湖昇東鄉園上

周孝子應魁墓在武進安西鄉奔牛周家村

沈孝子明墓在武進安西鄉宋壑

何孝子欲行墓在陽湖豐西鄉太平橋

顧孝子壽南墓在陽湖大甯鄉後羅琦郡人陸慶頤爲誌

志餘

卷四

墓

七

王孝子阿四墓在陽湖豐西鄉後潢

諸生馮孝子景琦墓在陽湖昇東鄉廟墩灣

王孝女墓在武進安西鄉楊家村

趙氏忠節墓在陽湖中右廂古村咸豐十年粵逆之難教諭

贈道銜趙起奪賊刃死於所居約園子廩生曾寅衛父被

戕八品銜曾祉孫九品銜承毅文童承銓起妾蔣子婦劉

汪劉湯姪婦王呂子妾顧孫婦余孫女適劉氏六姑三姑

登姑細姑姪女適呂氏及呂氏之女大姑二姑甥婦謝吳

氏吳氏之子慰祖子婦謝談氏女六姑再甥婦呂胡氏僕

婦楊顧蔣王周陸婢雙福秋鞠素芳鳳蘭月芳雪娥皆投

池死賊不敢居鄰人舉諸屍瘞園西北隅兵後立石誌焉
忠義冢在武進德澤鄉十四都二圖三圖免科地八畝有
奇邑人吳容光督飭夫役檢拾池井骨殖分別埋以磁罈
立碑記之建屋爲祠祭之所總督馬新貽巡撫丁日昌
奏請列入祀典援祭厲之例歲清明七月望十月朔守土
官詣祭永爲定例武進縣知縣鹿伯元記曰咸豐十年四
月髮逆攻陷郡城屯踞四年之久殉難紳民婦女不下數
萬同治三年四月克復後官紳辦理善後事宜先將徧地
遺骸彙葬四郊繼卽挑濬城內河道池井骨積如山類皆
隨城自盡久沒深淵尤堪憫惻購地北郊叢葬骨冢詳請

志餘

卷四

學墓

八

奏議奉

旨俞允列入祀典照祭厲之例屆期山守土官詣祭並蠲免
冢地錢糧漕米等因欽此竊維常郡崇尚節義好善樂施
當城陷時數萬生靈見危投命忠義之氣塞於兩閭經紳
董籌備經費掩埋白骨實爲先務之要夫表揚忠烈朝
廷之政也克全節義立身之志也好善樂施紳士之德也
斯舉也不足見存心之厚造福之無窮哉邑之德澤鄉地
八畝一分四毫四忽埋葬開撈河十七道池八十餘處浚
井一百五十餘口骨殖先是叢葬九十二冢復又開河浚
井續葬四十三冢各立一碑鐫載某河某池某井忠義骨

家栽植松栢百株建立享堂兩進各三間左右廂屋各一間存北存仁堂息本制錢百千以作歲修祭祀之費從此大義凜凜著於祀典叢冢纍纍雜繫綱常伯元承乏斯土都人士屬余爲記不敢以不文辭遂紀其事於右

武進各鄉忠義冢 一在欽風鄉森莊塘咸豐庚申拒賊殉難義民四五千入巡撫丁日昌記曰署武進縣事鹿君伯元旣葬義民江正會等忠骸於欽風鄉之森莊酌酒以祭之更開具事略索文泐石以垂於不朽所以發幽光揚義烈也余案其略曰義民江正會江傳林太學生江正榮等武邑欽風鄉森莊村人也略涉詩書剛勇而知大義咸豐

志餘

卷四

學墓

九

十年正月髮逆出金陵下盩州同劉允清倡捐團練正會等募義爭先四月賊逼郡城劉允清督團築壘與賊相持於礮礮壘壘爲丹壇入郡要路也連日接仗獵戶賀敘茂等善火器連斃黃巾賊首賊不敢逼改道攻陷郡城而外股潛抄壘後民團潰解允清受傷走死江北江正會等復招集散亡避居村北之森莊塘塘週圍數十里中有蘆灘廣可數百畝正會等結廬其上四面築壘爲久守計當是時蘇常郡縣多陷寇氛肆煽賊渺茲彈丸地脅令蓄髮裹頭正會等誓不從逆賊怒沿塘焚掠用木筏下塘屢被正會等殺退遠近以塘爲恃數年之間避賊移居者日衆財

穀充物其中賊利其資復大起數萬賊圍塘正會等日夜死拒賊僞退塘中人勞瘁暫息夜值大霧賊乘霧負小舟下塘塘中人猝不及防遂盡爲所屠死者數千塘水爲赤時同治二年五月十三日事也嗚呼時大軍旣克常昭稍遲則數千人皆可不死而竟皆死矣嗚呼悲夫銘曰人誰不死死忠與義吁嗟乎森莊塘之義民相與不受賊污拒守屢年甘心駢死而無貳叢冢纍纍其毅魄上千層霄足以扶百世綱常於不墜賢使君葬之祭之磨礪待銘於以追軌張許守睢陽之軼事 一在安西鄉能仁寺場西沿河寺田內咸豐十年閏三月晦日鄉團義民助提督馬德

志餘

卷四

學墓

十

昭軍擊賊遇害者 一在鳴鳳鄉鵬嬰灘庚申遇賊投河殉難男婦二百餘人 孝東鄉二一在安家舍河西街南官灘義民岳根三等擊賊殉難者一百五十三人一在岳家塘陣亡義民七十一人 一在依西鄉四十都五圖 一在大有鄉岡角村旁殉難義民八百餘人

陽湖各鄉忠義冢 一在昇西鄉十都二圖 豐西鄉二一在四十三都二圖 一在三圖



